

EL SANTO EVANGELIO SEGUN SAN MARCOS

*Juan upurumbibautiza vae umimbeu Tumpa iñee
(Mt 3.1-12; Lc 3.1-20; Jn 1.19-28)*

¹ Añave aicuatía añ ñee icavi vae Jesucristo regua. Jesucristo co jae Tumpa Tai.

² Isaías co jae penti Tumpa iñee aracae umimbeu vae. Jae uicuatía cuarāi:
“Mase” —jei Tumpa —, “che amondota chiñee güiraa vae nderenonde,
uyapicatu vaerā nderaperā.

³ Jae iñeeäta reve jeita ñana pe:
‘Piyapicatu yandeYa japerā.

Pemisiimi tape’ ” —jeita, jei Tumpa.

Jucuarāi uicuatía Isaías. ⁴ Jáeramo Juan ou upurumbibautiza ñana pe, jare umimbeu yati ñugüinoi vae reta pe:

—Peeya piyemingueta icavi mbae vae pepia pe oí vae, jare che pumbibautizata, Tumpa umbiasa vaerā peve pembaeyoa reta —jei chupe reta. ⁵ Jarejeta iví Judea pegua reta jare tenta guasu Jerusalén pegua reta yugüiraa Juan oí vae pe. Jare Juan umbibautiza reta iaca Jordán jee vae pe, imbaeyoa reta opa umimbeu yave. ⁶ Jare Juan jemimonde maemimba camello jee vae jaagüe pegua co, jare jumbicuua guacapi pegua co. Jare jembíu co jae tucu jare ei ñana rupigua. ⁷ Jae umimbeu yati vae reta pe:

—Cheraicue rupi outa ipuere ete chegüi vae. Jupi'ā co che chepe ayora vaerā ipipasa ichā.

⁸ Che pumbibautiza i pe, ñrei jae pembibautizata Espíritu Santo pe —jei chupe reta.

*Juan umbibautiza Jesús
(Mt 3.13-17; Lc 3.21-22)*

⁹ Jare mboví ara rupi ou Jesús tenta guasu Nazaret ivi Galilea pegua güi. Jare Juan umbibautiza Jesús iāca Jordán pe. ¹⁰ Jare Jesús oē ye i güi yave, uecha ara uyepea oī, jare uecha vi Espíritu Santo ugüeyi jese picasu rami. ¹¹ Jayave uyendu ñee ara güi jei:

—Nde co jae cheRai ndauau ete vae. Chembiyerovia ete —jei.

*Satanás umingueta Jesús uyavica vaerã tẽi chupe
(Mt 4.1-11; Lc 4.1-13)*

¹² Jayave Espíritu Santo omundo Jesús ñana pe. ¹³ Jare upita ñana pe cuarenta ara, jare Satanás umingueta uyavica vaerã tẽi chupe. Jare ico Jesús maemimba ñana rupigua reta ñugüinói vae pe. Jare Yugüeru ángel reta omborí vaerã.

*Jesús umbipi iparavi qui
(Mt 4.12-17; Lc 4.14-15)*

¹⁴ Juan uyemingueca ma peresoríru pe yave, oo Jesús Galilea pe, jare umimbeu ñee icavi vae Tumpa iporoyocuia regua. ¹⁵ Jesús jei:

—Ara uvae ma. Outa uvae Tumpa iporoyocuia. Peeya piyemingueta icavi mbae vae pepia pe oī vae, jare perovia Tumpa iñee icavi vae —jei.

*Jesús ueni irundi cuimbae pira uipisi vae reta
(Mt 4.18-22; Lc 5.1-11)*

¹⁶ Jare uguata rambueve i guasu Galilea jembei rupi, Jesús uecha Simón jare Simón tivi Andrés jee

vae. Jae reta omombo ñugüinói pisa i guasu pe, pira uipisi vaerã. Echa'ã jae reta pira uipisi vae reta co. ¹⁷Jayave Jesús jei chupe reta:

—Peyu cherupié, jare che chembapuere pe pemboeta ūru vae reta güirovia vaerã cheré —jei.

¹⁸Jayave ueya reta ipisa, jare yugüiraa jae jupié. ¹⁹Ndei mbiri oo mbove, Jesús uecha Zebedeo tai reta. Penti jee Jacobo, jare tiví jee Juan. Uyapicatu ñugüinói pisa reta chalana pe. ²⁰Jare Jesús ueni voi. Jayave jae reta ueya tu chalana pe uparaviquí chupe vae reta ndive, jare yugüiraa Jesús jupié.

*Cuimbae aña oya jese vae
(Lc 4.31-37)*

²¹Jare yugüiraa uvæ tenta guasu Capernaum pe. Jare mbutuu ara pe Jesús uique judío reta itupao pe, jare joco pe oporomboe. ²²Jare uyapisaca jese vae reta ipiacañi iporomboe re. Echa'ã omboe reta mbaepuere güinói vae rami. Jucuarã'lã oporomboe mboroyocui re oporomboe vae reta. ²³Jare uique oo tupao pe cuimbae aña oya jese vae. Jae iñeeata reve jei:

²⁴ —¿Maera pa ndeyu oremambeco, Jesús Nazaret pegua? ¿Ndeyu pa oremicañitei vaerã? Che nducuaa. Nde co jae Tumpa Tai —jei.

²⁵Jayave Jesús uñeengata aña pe.

—¡Nequii! Esiri chugüi —jei.

²⁶Jayave aña umbiriri ete jocua cuimbae, jare tanta jâse reve usiri chugüi. ²⁷Jare opaete uecha vae reta ipiacañi, jare upirandu uyupe:

—¿Mbae pa co cua uyapo vae? ¡Moromboe ipiau vae ndipo! Mbaepuere pe oyocui aña reta usiri

vaerã oya jese vae reta güi, jare jae reta uyapo oyocui vae —jei reta.

²⁸ Jayave imambaeño jerācua jesegua opaete Galilea rupi.

*Jesús umbigüera Pedro jaicho
(Mt 8.14-15; Lc 4.38-39)*

²⁹ Jare Jesús judío reta itupao güi oẽ ye yave, oo Simón jare Andrés jenta pe Jacobo jare Juan ndive. ³⁰ Simón jaicho jacu oĩ jupa pe. Jare ūru reta umimbeu Jesús pe jesegua. ³¹ Jayave Jesús oo uipisi ipo pe, jare umupūa. Jare jacu upita voi chugüi. Jayave jocua cuña umee mbae jou reta vaerã.

*Jesús umbigüera jeta imbaerasi vae reta
(Mt 8.16-17; Lc 4.40-41)*

³² Jare guarasi uique ma yave, tenta guasu pegua reta güeru Jesús pe imbaerasi vae reta jare aña oya jese vae reta. ³³ Jare jeta joco pegua reta uyembati jocua tenta jonque pe. ³⁴ Jayave Jesús umbigüera jeta imbaerasi vae reta ipotave mbaerasi güi, jare umbisiri jeta aña reta oya jese vae reta güi. Jare umaeño'ã aña reta re uyemingueta vaerã. Echa'ã jae reta uicuaa quía co jae.

*Jesús oo ivi Galilea rupi umimbeu Tumpa iñee
(Lc 4.42-44)*

³⁵ Piareve pe Jesús upūa ndei cõe mbove, jare oẽ oo quïi ngatu vae pe. Joco pe uyerure oĩ Tumpa pe.

³⁶ Jayave Simón jare jae ndive ñugüinói vae reta yugüiraa ueca. ³⁷ Jare uvae chupe yave, jei reta Jesús pe:

—Ndereca ñugüinói reta —jei reta.

38 Jayave Jesús jei chupe reta:

—Yaa ūru tenta guasu-raí reta coiño ñugüinói vae pe, joco pe vi amimbeu vaerā Tumpa iñee. Echa'ā ayu cua ayapo vaerā —jei.

39 Jare oo opaete íví Galilea rupi, jare umimbeu Tumpa iñee judío reta itupaopao rupi, jare umbisiri aña reta oya jese vae reta güi.

Jesús umbigüera cuimbae ipire ocui vae

(Mt 8.1-4; Lc 5.12-16)

40 Jayave ou Jesús oñ vae pe penti cuimbae ipire ocui vae. Uyeatica Jesús jovai jare uyerure chupe:

—Ndipota yave, ndepuere chembigüera —jei chupe.

41 Jesús uiparareco umae jese, jare oñono ipo jese.

—Aipota. Ecuera —jei chupe.

42 Jare jupivoiño cuimbae ucuera imbaerasí güi. Ocui'ā ma ipire. **43** Jare jupivoiño Jesús oyocui ete, ndei omondo mbove:

44 —Agüiye emimbeu quía pe. Ecua iyeechaca sacerdote pe, jare emee ofrenda Moisés peocui ramí, tenta guasu pegua reta uicuua vaerā ndecuera ma co —jei.

45 Êrei cuimbae oo, jare umbipi umimbeu ūru vae reta pe. Jecuae umimbeujeta vae pe. Jáeramo Jesús ipuere'ā ma oo tenta guasu reta pe joco pegua reta jovaque. Upita ñana rupi, jare yugüeru jae oñ vae pe opaete que rupi rupi güi.

2

Jesús umbigüera cuimbae ipuere mbae omi vae

(Mt 9.1-8; Lc 5.17-26)

¹ Mbovi ara rupi Jesúś oo ye Capernaum pe, jare jerācua jae ime oī jenta pe. ² Jayave jeta vae uyembati joco pe, jare tīnee ñugüinoi o pe jare onque rupi. Jare Jesúś umimbeu Tumpa iñee chupe reta. ³ Jayave amocue yugüeru vae reta güeru penti cuimbae imbaerasi vae. Cua cuimbae ipuere mbae omi vae. Uyerevoica ou irundi cuimbae reta pe. ⁴ Ërei güeru vae reta ipuere'ā uruique jocua cuimbae Jesúś oī vae pe, uyembiape'ā ye ñugüinoi reta ramo. Jáeramo uruyupi o iárambo jare uipea chupe Jesúś jese catu. Joco pe umbigüeyi jocua cuimbae ipuere mbae omi vae jupa reve. ⁵ Jesúś cua uecha yave, uicuā jae reta güirovia co jese, jare jei cuimbae ipuere mbae omi vae pe:

—Nembayoaa reta uyembai ma, cherivi.

⁶ Amocue mboroyocui re oporomboe vae reta uguapi ñugüinoi joco pe, jare ipia pe uyemingueta reta: ⁷ “¿Maera pa jei cuarāi cua cuimbae? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” Jucuarāi ipia pe uyemingueta reta. ⁸ Jare Jesúś uicuā voi jae reta ipiayemingueta, jare jei chupe reta:

—¿Maera pa pepia pe piyemingueta jucuarāi?

⁹ Chepuere jae cua cuimbae ipuere mbae omi vae pe: ‘Nembayoaa reta uyembai ma.’ Jae ramiño vi chepuere jae chupe: ‘Epua evoi nderupa, jare eguata.’ ¿Mbae nunga pa yavai jae vaerā? —jei Jesúś chupe reta—. ¹⁰ Ërei aipota picuāa vaerā cua: Che cuimbaerā ayeyapo vae chepuere ambiasa quía pe imbaeyoa reta cua ivi pe aī rambueve —jei.

Jayave jei cuimbae ipuere mbae omi vae pe:

11—Che jae ndeve: Epūa evoi nderupa, jare ecua nerenta pe.

12 Jayave cuimbae upūa, jare ovoi jupa, jare oē voi oo opaete joco pe ñugüinoi vae reta jovaque. Opareve ipiacañi, jare umbiadora reta Tumpa.

—Yaecha'āi cua nunga —jei reta.

Jesús ueni Leví

(Mt 9.9-13; Lc 5.27-32)

13 Jayave Jesús oo ye i guasu jembeí pe. Jare jeta vae reta uyembati jae oī vae pe, jare jae omboe reta. **14** Jare joco güi oo yave, uecha Alfeo tai Leví jee vae uguapi oī mburuvicha peguarā ocovara ñugüinoi vae pe, jare jei chupe:

—Eyu cherupié.

Jayave Leví upūa, jare oo jae jupié.

15 Jare Jesús ucaru oī rambueve Leví jenta pe, jeta mburuvicha peguarā ocovara vae reta jare teco icavi mbae vae uyapo vae reta ucaru vi ñugüinoi Jesús jare jemimboe reta ndive. Echa'ā jecuaeño jeta jae reta yugüiraa Jesús ndive.

16 Jayave mboroyocui re oporomboe vae reta jare fariseo reta uecha yave Jesús ucaru oī ocovara vae reta jare teco icavi mbae vae uyapo vae reta ndive, jei jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

17 Jesús cua uyandu yave, jei chupe reta:

—Icove catu vae reta ueca'ā upurupiāno vae. Imbaerasi vae retaño ueca. Che ayu aeca vaerā iyoa vae reta. Ayu'ā aeca vaerā jupi vae reta —jei.

*Maera Jesús jemimboe reta uyecuacu'ã tembíu güi
(Mt 9.14-17; Lc 5.33-39)*

¹⁸ Jare Juan jemimboe reta jare fariseo jemimboe reta uyecuacu ñugüinoi tembíu güi. Jayave amocue vae yugüeru, jare upirandu Jesús pe:

—¿Maera pa Juan jemimboe reta jare fariseo jemimboe reta uyecuacu tembíu güi, ērei nderemimboe reta uyecuacu'ã chugüi?

¹⁹ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembíu güi, umendata vae jae reta ndive oĩ rambueve. Echa'ã umendata vae jae reta ndive oĩ rambueve, uyecuacu'ã tembíu güi. ²⁰ Ērei outa uvāe ara umendata vae uyereraaca vaerā chugüi reta. Jayave ramo uyecuacuta tembíu güi —jei—. ²¹ Icaví'ã yamboya vaerā temimonde indechi vae maemboyaa ipiau vae pe. Echa'ã jucuarãi yayapo yave, maemboyaa ipiau vae umiāta temimonde indechi vae, jare temimonde jeiete osoro —jei—. ²² Jae ramiño vi icaví'ã yambiru vaerā vino ipiau vae vino jíru guacapi indechi vae pe. Echa'ã jucuarãi yayapo yave, vino omondoro jíru, jare vino uyepiyere, jare jíru icaví'ã ma. Jáeramo yambiru vino ipiau vae jíru ipiau vae pe —jei chupe reta.

*Jesús jemimboe reta uipoo trigo mbutuu ara pe
(Mt 12.1-8; Lc 6.1-5)*

²³ Mbutuu ara pe Jesús oo co rupi jemimboe reta ndive. Uasa rambueve, jemimboe reta uipoo trigo. ²⁴ Jayave fariseo reta jei Jesús pe:

—Mase, ¿maera pa uyapo reta agüiyeta tēi uyapo mbutuu ara pe vae?

25 Jesús jei chupe reta:

—¿Pemingueta'ã pa David uyapocue vae regua, jae jare jae ndive ñugüinoi vae reta mbaeti ma mbae güinoi yave jare iyembai reta? —jei—.

26 David uique Tumpa jo pe, sacerdote tenondegua Abiatar jee vae ico yave, jare jou mbiyape Tumpa jo pe uñeñono tee vae reta. Agüiyeta tēi co quía jou jocua mbiyape, jaeño sacerdote reta. Jare David umee vi jae ndive ñugüinoi vae reta pe —jei chupe reta.

27 Jayave Jesús jei chupe reta:

—Mbutuu ara uyeyapo yanembori vaerā. Yande yayeyapo'ã mbutuu ara peguarā. **28** Jáeramo che cuimbaerā ayeyapo vae chepuere jae mbae icavi uyeyapo vaerā mbutuu ara pe —jei.

3

*Cuimbae ipo jobaicho tipa vae
(Mt 12.9-14; Lc 6.6-11)*

1 Jesús uique ye judío reta itupao pe, jare joco pe oĩ penti cuimbae ipo jobaicho tipa vae. **2** Jare joco pe ñugüinoi vae reta umae ngatu Jesús re, uecha vaerā umbigüerata ra quía mbutuu ara pe. Echa'ã jae reta uipota tēi umbijeco Jesús. **3** Jayave Jesús jei cuimbae ipo jobaicho tipa vae pe:

—Epúa eyu iyemboi cua reta jovai.

4 Jare Jesús upirandu joco pe ñugüinoi vae reta pe:

—¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca

vaerã mbutuu ara pe? ¿Mbae pa jei mboroyocui cua re? —jei chupe reta.

Êrei jae reta jei'ã mbae ave. ⁵ Pochi reve Jesús umae iyipi rupi ñugüinói vae reta re, jare tuicha ipiatiti jae reta ipiatanta ramo.

—Eupi ndepo —jei cuimbae pe.

Jayave cuimbae ipo uupi, jare ucuera voi. ⁶ Jayave fariseo reta oẽ judío reta itupao güi, jare uyemboemboe voi herodiano reta ndive Jesús re, quiráita ra uyucaca vaerã.

Jeta uyembati i guasu jembeí pe

⁷⁻⁸ Jayave Jesús jare jemimboe reta Yugüiraa i guasu pe, jare Yugüiraa vi jaicue jeta Galilea güi. Jare Yugüeru vi jae oĩ vae pe jeta Judea pegua reta, Jerusalén pegua reta, ivi Idumea pegua reta, Jordán jovaicho pegua reta, jare tenta guasu Tiro jare Sidón iyipi rupigua reta, uyandu yave opaete Jesús uyapo vae regua. ⁹ Jare Jesús oyocui jemimboe reta umicuatiro chalana jae oĩ vaerã pípe, agüiye vaerã oyopi yati vae reta. ¹⁰ Echa'ã jae umbigüera ma jeta vae, jare opaete ñru imbaerasi vae reta uñemiañamiaña Yugüeru icoti. Echa'ã uipota oya jese, uyaviqui vaerã. ¹¹ Jare aña reta uecha Jesús yave, uyeaticha jae jovai jare iñeeäta reve jei:

—Nde co jae Tumpa Tai.

¹² Jare Jesús oyocui ete:

—Agüiye pemimbeu quía co che.

Jesús uiparavo doce cuimbae reta

(Mt 10.1-4; Lc 6.12-16)

¹³ Jayave Jesús oo ivitu guasu re, jare ueni jae uiparavo vae retaño. Jare jae reta Yugüeru jae

oī vae pe. ¹⁴ Jare jocua reta güi uiparavo doce cuimbae reta umíru vaerā. Jae omondota reta umimbeu vaerā Tumpa iñee. ¹⁵ Umeeta vi chupe reta mbaepuere umbigüera vaerā imbaerasi vae reta jare umbisiri vaerā aña reta oya jese vae reta güi. ¹⁶ Cua co jae uiparavo vae reta jee: Simón (Jesús umbijee Pedro), ¹⁷ jare Zebedeo tai reta Jacobo jare Juan jee vae (Jesús umbijee cua mocui reve Boanerges. Cua jee uipota jei: “Ara jiapu vae rami”), ¹⁸ jare Andrés, Felipe, Bartolomé, Mateo, Tomás, Alfeo tai Jacobo jee vae, Tadeo, Simón (jae co Zelote pe ueni vae), ¹⁹ jare Judas Iscariote (cua cuimbae umee Jesús jovaicho reta pe). Jayave Jesús ou ye jenta pe jae reta ndive.

*Jei reta icavi mbae vae Espíritu Santo cotí
(Mt 12.22-32; Lc 11.14-23; 12.10)*

²⁰ Jare uyembati ye jeta vae. Jáeramo Jesús jare jemimboe reta iquíil'ā ucaru vaerā. ²¹ Jesús jentará reta cua uicuaa yave, yugüeru güiraa vaerā tēi.

—Iyaracuaa'ā ma oī —jei reta.

²² Jare mboroyocui re oporomboe vae yugüeru Jerusalén güi vae reta jei:

—Aña guasu Beelzebú jee vae oya ma jese, jare aña guasu imbaepuere pe umbisiri aña reta oya jese vae reta güi —jei reta.

²³ Jayave Jesús ueni reta, jare jei chupe reta umijaanga reve:

—Ndarau Satanás jaei uyembisiri cuimbae güi.

²⁴ Penti tenta guasu pegua reta oyovaicho uyupii yave, opata co jocua tenta guasu. ²⁵ Jae ramiño vi penti tenta pegua reta oyovaicho uyupii yave, opata co jocua tenta. ²⁶ Jare Satanás pochi iyupe

yave, jare imbaepuere uyembiyao yave, ndarau tēi ma ico. Opata tēi co —jei chupe reta—. ²⁷ Ime yave quía uipota uique cuimbae ipirāta vae jenta pe upīro vaerā imbaembae chugüi vae, uipocuata rani cuimbae ipirāta vae. Jayave ramo ipuereta upīro imbaembae chugüi —jei—.

²⁸ Añete che jae peve, opaete ivi pegua reta imbaeyoa reta jare opaete iñee icavi mbae Tumpa coti jei reta vae Tumpa ipuere umbai. ²⁹ Ërei Tumpa ndarau etei umbiasa jei icavi mbae vae Espíritu Santo coti vae pe. Uyembijecota jaeño mai pegua —jei chupe reta.

³⁰ Echa'ã tenonde yave jae reta jei:

—Aña oya ma jese.

Jáeramo Jesús jei jucuarāi chupe reta.

*Jesús ichi jare tiví reta
(Mt 12.46-50; Lc 8.19-21)*

³¹ Jayave Jesús ichi jare tiví reta yugüeru uvāe Jesús oĩ vae pe, jare oca güi omondo uenica. ³² Jare uguapi ñugüinoi iyipi rupi vae reta jei chupe:

—¡Aipo! Ndesi jare nderivi reta oca pe ñugüinoi, jare ndereca.

³³ —¿Quía nunga pa co jae chesi jare cherivi reta? —jei Jesús chupe reta.

³⁴ Jayave umae iyipi rupi uguapi ñugüinoi vae reta re.

—Cua nunga reta co jae chesi jare cherivi reta —jei—. ³⁵ Echa'ã Tumpa jei vae uyapo vae reta co jae cherivi jare cherindi jare chesi —jei.

4

*Jesús umijaanga umaeti vae
(Mt 13.1-9; Lc 8.4-8)*

¹ Jesúus umbipi ye oporomboe i guasu jembei pe. Jayave jeta Yugüeru uyembati jae oĩ vae pe. Jáeramo Jesúus uyupi penti chalana i guasu pe oĩ vae pe, jare uguapi pipe. Jare yati vae reta ñugüinoi i guasu jembei pe. ² Jare Jesúus omboe reta jeta mbaembae re umijaanga reve. Jei chupe reta:

³ —Piyapisaca cheré. Penti cuimbae oo umaeti vaerä —jei—. ⁴ Umaeti yave, umiai temiti, jare amocue oa tape rupi. Jayave Yugüeru güira reta opa jou —jei—. ⁵ Íru temiti oa mboviño ivi itape iárambo oĩ vae pe. Cua imambae oẽ, jeta'ã ivi chupe ramo. ⁶ Èrei guarasi jasi yave, ipiru. Jare japo quipe'ã oĩ ramo, utini —jei—. ⁷ Íru temiti oa ñanapite pe. Ñana ucuacuaa yave, opa uyuca temiti. Jáeramo temiti ia'ã —jei—. ⁸ Jare íru temiti oa ivicavi pe. Cua reta oẽ, jare ucuacuaa, jare ía. Amocue mboviño jãi, jare íru jeta catu jãi, jare íru jeta ete jãi —jei chupe reta. ⁹ Jayave Jesúus jei chupe reta:

—Uipota uyandu vae tuyapisaca cua ñee re.

*Maera Jesúus oporomboe umijaanga reve
(Mt 13.10-17; Lc 8.9-10)*

¹⁰ Mboviño ma upita jae ndive yave, jocua doce uiparavo vae reta jare íru upita vae reta upírandu Jesúus pe umijaanga reve jei vae re. ¹¹ Jayave Jesúus jei chupe reta:

—Amimbeu ma peve Tumpa iporoyocuia regua. Cua uyecuua'ã íru vae reta pe. Jáeramo amboe íru vae reta amijaanga reve —jei—. ¹² Cua ayapo

agüiye vaerā uicuaa cavi, yepe tēi uecha, jare agüiye vaerā uicuaa, yepe tēi uyandu, jare agüiye vaerā uyerova Tumpa coti, imbaeyoa reta uyembai vaerā —jei.

*Umaeti vae uyemijaanga jese vae
(Mt 13.18-23; Lc 8.11-15)*

¹³ Jayave Jesús jei chupe reta:

—¿Picuaa'ã pa mbae cua amijaanga reve jae peve vae uipota jei vae? Picuaa'ã yave, ¿quirāita pa picuaa mbae opaete amijaanga reve jaeta peve vae uipota jei vae? —jei—. ¹⁴ Jocua umaeti vae uyemijaanga Tumpa iñee umimbeu vae re —jei—. ¹⁵ Temiti tape rupi oa vae uyemijaanga amocue Tumpa iñee uyandu vae re. Ërei jupivoiño ou Satanás, jare umiacañi Tumpa iñee güi —jei—. ¹⁶ Jae ramiño vi jocua temiti uñeñotí mboviño ivi itape iárambo oĩ vae pe vae uyemijaanga ūru vae reta Tumpa iñee uyandu vae re. Jupivoiño uyerovia reta, jare uipota ete cua ñee. ¹⁷ Ërei cua reta jocua temiti japo quipe'ã oĩ vae rami co. Jáeramo imambae icueri reta. Mbaesusere uyeyapo chupe reta ani ūru vae reta uyapo icavi mbae vae chupe reta Tumpa iñee uicuaa ramo. Jare jupivoiño uipota'ã ma uyapisaca reta Tumpa iñee re —jei—. ¹⁸ Jae ramiño vi jocua temiti uñeñotí ñanapite pe vae uyemijaanga ūru vae reta Tumpa iñee uyandu vae re. ¹⁹ Ërei jae reta umbipi uyemipia'ã ivi pe mbaembae uyeyapo vae re, jare uyembitavi, uipota icocatu ramo. Uipota vi güinoijeta mbaembae. Jare opaete cua umiacañi reta Tumpa iñee güi. Jáeramo jae reta jocua temiti ia'ã vae rami co —jei—. ²⁰ Ërei jocua temiti uñeñotí ivicavi pe vae

uyemijaanga ūru vae reta Tumpa iñee uyandu vae re. Cua reta güirovia. Amocue vae jocua temiti mboviño jāi vae rami co. ūru vae reta jocua temiti jeta catu jāi vae rami co. Jare ūru vae reta jocua temiti jeta ete jāi vae rami co —jei.

*Uñeñomi vae uyeechacañotai co
(Lc 8.16-18)*

21 Jayave Jesús jei chupe reta:

—Mechero yaruique yave o pe, ndarau ñañono yapepo uyembovapo oĩ vae igüi pe, ani güirapembí igüi pe. Ñañono co mechero jenda pe —jei—. **22** Ime yave mbae uñeñomi vae, uyeechacañotai co. Jae ramíño vi ime yave mbae uyeyasoi vae, uyecuaañotai co —jei—. **23** Uipota uyandu vae tuyapisaca cua ñee re —jei Jesús.

24 Jare jei chupe reta:

—Pepia pe piyemingueta cavi piyandu vae re. Tumpa umiaangata umee peve pemiaanga pemee ūru vae reta pe rami, jare umíruta vi peve —jei—. **25** Echa'ã güinoi vae pe uñemíruta, jare mbaeti güinoi vae güi mbovi ete güinoi vae uyeequita —jei.

Jesús umijaanga temiti ucuacuaa vae

26 Jare Jesús jei chupe reta:

—Tumpa iporoyocuia penti cuimbae oo umaeti vae rami co —jei—. **27** Cuimbae oque p̄itu yave, jare upúa cõe yave. Temiti oẽ jare ucuacuaa, jare umaeti vae uicuaa'ã quirãi ra ucuacuaa vae. **28** Echa'ã temiti ucuacuaa yambori mbae reve, tenonde ii, jayave avatiqui, joco güi avati —jei—.

²⁹ Jare yagüiye ma yave, iya uaviro. Echa'ā uvāe ma ara uaviro vaerā —jei chupe reta.

*Jesús umijaanga mostaza jāicue
(Mt 13.31-32; Lc 13.18-19)*

³⁰ Jare Jesús jei:

—¿Mbae ra ipuere uyemijaanga Tumpa iporoy-
ocuia re? ¿Mbae ra yamijaangata jese? —jei—
. ³¹ Yandepuere yamijaanga jese penti mostaza
jāicue —jei—. Uñeñoti yave, cua jāicue michi-
rai ete opaete ūru temiti reta jāicue ivi pe oī vae
güi. ³² Êrei uñeñoti yave, ucuacuua, jare tuicha
ete opaete ūru temiti penti año peguaño ucuacuua
vae reta güi, jare tuicha jāca uyeyapo. Jáeramo
güira reta ipuere uyapo jaitirā jese guarasiá pe —
jei chupe reta.

*Maera Jesús umijaanga mbaembae
(Mt 13.34-35)*

³³ Jeta cuarai Jesús umimbue Tumpa iñee
chupe reta umijaanga reve, jae reta ipuere
uicuaa rupiño. ³⁴ Jare jecuaeño imiari chupe
reta umijaanga reve. Êrei jemimboe reta peño
uicuaaca cavi mbae uipota jei vae.

*Jesús umiqui i guasu
(Mt 8.23-27; Lc 8.22-25)*

³⁵ Jocua ara guarasi uique ma yave, Jesús jei
jemimboe reta pe:

—Yaa i guasu jobaicho pe —jei.

³⁶ Jayave jae reta ueya yati vae reta, jare güira
Jesús jocua chalana oī pipe vae pe. Jare ūru vae reta
yugüira vi ambie chalana reta pipe. ³⁷ Jare ou
ivitu tanta uyepeyu, jare i uyembiaparoaroa uique

chalana pe, jare umitinee seri ma. ³⁸ Jare Jesús uñemíācanita chalana iyapi pe, jare oque oī. Jayave jae reta omomba jare jei chupe:

—¡Oporomboe vae! ¿Ndepia'ā pa opata mañamanc?

³⁹ Jayave Jesús upūa, jare uñeengata ivitu pe.

—¡Epita! ¡Nequili! —jei i guasu pe.

Jare ivitu javoi upita, jare opaete quii ngatu.

40 Jayave Jesús upirandu chupe reta:

—¿Maera pa pequiyé? ¿Ndeíño pa
pepurugüírovia? —jei.

41 Jare uquiyé ete reta, jare jei uyupe:

—¿Mbae nunga cuimbae pa cua? Ivitu jare i
guasu uyapo jae oyocui vae —jei reta.

5

Gadara peguaaña oya jese vae

(Mt 8.28-34; Lc 8.26-39)

¹ Jayave yugüiraa uvāe i guasu jovaicho pe, gadareno reta iivi pe. ² Jesús ugüeyi chalana güi rupive, ou ooväiti teögürirurenda güi penti cuimbaeaña oya jese vae. ³ Jae ico teögürirurenda rupi, jare ipuere'ã ma quíauñapíti, yepe tēi uñapíti cadena pe. ⁴ Jeta vese ma jae reta uipocua tēi ipo jare ipi cadena pe. Êrei jae opa omondoo cadena reta. Jare ipuere'ã quíau jese. ⁵ Jare jecuaeño pítu rupi jare ara rupi oĩ teögürirurenda rupi jare ivitu guasu rupi, jare jecuae usapicai jare uyembipere ita pe. ⁶ Cua cuimbae uecha yave Jesús mbiri güi, osi ou icoti jare uyeatica jovai. ⁷ Jare iñeeäta reve jei:

—¿Maera pa ndeyu chemambeco, Jesús? Nde co jae Tumpa ara pe oĩ vae Tai. Ayerure ndeve Tumpa jee re agüiye iporaraca cheve —jei.

⁸ Echa'ã Jesús jei aña pe:

—Esiri cua cuimbae güi, aña.

⁹ Jayave Jesús upirandu chupe:

—Mbae pa nderee?

—Cheree co jae jeta vae. Echa'ã jeta vae co ore —jei chupe.

¹⁰ Jare aña reta uyerure Jesús pe agüiye vaerã umbisiri reta jocua iví güi. ¹¹ Jare joco pe jeta cuchi reta ucaru ñugüinoi coiño ivítu guasu güi. ¹² Jayave aña reta uyerure Jesús pe:

—Oremundo pea cuchi reta cotí. Emaeño oreré ndoya vaerã jese reta —jei reta.

¹³ Jayave Jesús umaeño jese reta. Jare aña reta usiri cuimbae güi, jare oya cuchi reta re. Jayave cuchi reta tanta osi iví rupi oa i guasu pe, jare joco pe opa ipitupa reta. Cuchi reta uyepapa dos mil rupi.

¹⁴ Jayave cuchi iyandarecoa reta opa osi, jare umimbue tenta guasu pegua reta pe jare jocoropi ñugüinoi vae reta pe cua uyeyapo vae regua. Jare uyandu vae reta yugüeru, uecha vaerã mbae uyeyapo vae. ¹⁵ Jare yugüeru uvæ yave Jesús oĩ vae pe, uecha cuimbae aña oyase jese vae uguapi oĩ joco pe. Uecha uyemonde ma jare iyaracuaaño ma oĩ. Jae co tenonde yave jeta aña reta oyase jese vae. Jare opaete yugüeru vae reta uquiy. ¹⁶ Jare jocua tenonde yave uecha vae reta umimbue ūru reta pe quirai uyeyapo cuimbae aña oyase jese vae pe jare cuchi reta pe. ¹⁷ Jayave yati vae reta

umiñera Jesús oo ye vaerā jae reta iivi güi. ¹⁸ Jare Jesús uyupi ye ma oī yave chalana pe, jocua cuimbae aña reta oyase jese vae uyerure chupe:

—Emaeño cheré aa vaerā nderupié —jei.

¹⁹ Ërei Jesús umaeño'ã jese.

—Ecua nerenta pe emimbeu nerentará reta pe mbae icavi vae ndeYa uyapo ndeve vae, jare quirái ndeparareco vae —jei chupe.

²⁰ Jayave cuimbae oo, jare umbipi umimbeu iVi Decápolis jee vae rupi mbae icavi vae Jesús uyapo chupe vae. Jare opaete ipiacañi jese.

*Jairo tayıjare cuña Jesús jemimonde uyavíqui vae
(Mt 9.18-26; Lc 8.40-56)*

²¹ Jesús oo uvāe yave i guasu jovaicho coti chalana pípe, yugüeru jeta vae reta jae oī vae pe. Jare Jesús upita i guasu jembei pe. ²² Jayave ou penti cuimbae Jairo jee vae. Jae co judío reta itupao re uyandareco vae. Uecha yave Jesús, uyeatíca jovai.

²³ Jare uyerure chupe:

—Cherayi umanota ma oī —jei—. Yaa iñono ndepo jese embigüera, agüiye vaerā umano —jei chupe.

²⁴ Jayave Jesús oo voi jupié. Jare jeta yuguíraa Jesús jupié, jare oyopi reta. ²⁵ Jare jae reta ipite pe oo penti cuña doce año ma uiporara tugüiguasu vae. ²⁶ Jare uiporara ma jeta upurupiano vae reta uipiano tēi reve, jare opaete ma icorepoti umee iyugüi upurupiano vae reta pe. Ërei ucuera'ã. Jeseve jeieteño ma imbaerasi. ²⁷ Jae uyandu Jesús regua yave, oya Jesús re icupe coti jeta vae reta ipite rupi, jare uyavíqui jemimonde.

²⁸ —Yepe tēi jemimondeño tayavíqui, acuerata co —jei.

²⁹ Jare jupivoiño jugüiguasu upita chugüi, jare uyandu jete ucuera ma imbaerasi güi. ³⁰ Jayave Jesús uicuaa umbigüera ma co quía imbaepuere pe. Jáeramo uyerova umae jeta vae re, jare upirandu:

—¿Quía pa cheremimonde uyavíqui?

³¹ Jayave jemimboe reta jei chupe:

—Ndeecha co cua jeta vae reta ndeopi ñugüinoi. ¿Maera pa ndepirandu: ‘Quía pa cheremimonde uyavíqui?’ —jei reta chupe.

³² Ërei Jesús umae iyipi rupi, uecha vaerā quía ra jucuarāi uyapo. ³³ Cuña uicuaa uyeyapo ma chupe vae, jare ou icoti. Uquiyé güi uriri, jare uyeatíca Jesús jovai, jare umimbeu chupe opaete uyeyapo ma vae. ³⁴ Jayave Jesús jei chupe:

—Ndecuera ma, cherindi, nderovia cheré ramo. Ecua ndepiacatu reve. Ndecuera ma co nembaerasi güi —jei.

³⁵ Jare Jesús uyemingueta oĩ rambueve, yugüeru uväe amocue vae tupao re uyandareco vae jenta güi. Jare jei reta Jairo pe:

—Nderayı umano ma. Agüiye ma emambeco oporomboe vae —jei reta chupe.

³⁶ Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño —jei.

³⁷ Jare umaeño'ã ūru reta re yugüiraa vaerā jae ndive, jaeño Pedro, Jacobo jare Juan. Juan co jae Jacobo tiví. ³⁸ Yugüiraa uväe yave tupao re uyandareco vae jenta pe, Jesús uecha jeta vae reta

icorai jare uyao ñugüinoi reta jāse reve. ³⁹ Jesúś uique yave o pe, jei chupe reta:

—¿Maera pa picorai jare piyao? Cua cuñatai umano'ā co. Oqueño co oī—jei.

⁴⁰ Ěrei jae reta oyoyai. Jayave Jesúś omoē opaete vae oca pe, jare uruique cuñatai oī vae pe cuñatai tu jare ichi, jare jemimboe jae ndive yugüiraa vae reta. ⁴¹ Jayave Jesúś uipisi cuñatai ipo pe.

—Talita cumi —jei chupe. (Cua uipota jei: “Cuñatai, che jae ndeve, epūa”.)

⁴² Jayave cuñatai upūa jare umbipi uguata. Cua cuñatai doce año ma güinoi. Jare Jesúś ndive ñugüinoi vae reta ipiacañi ete. ⁴³ Jayave Jesúś oyocui ete reta agüiye vaerā umimbeu quía pe ave, jare oyocui vi umingaru vaerā cuñatai.

6

Jesús Nazaret pe (Mt 13.53-58; Lc 4.16-30)

¹ Jesúś oo joco güi iivi pe, jare jemimboe reta yugüiraa jupié. ² Jayave mbutuu ara pe Jesúś umbipi oporomboe judío reta itupao pe. Jarejeta vae uyapisaca jese, jare ipiacañi reta. Jei reta uyupe:

—¿Quiape ra uyemboe cua cuimbae opaete cua re? ¿Mbae nunga aracuaa ra uñemee chupe? ¿Mbae nunga miacañi ra cua uyapo ipo pe vae? —jei reta —. ³ Cua co jae carpintero. Jae co María imembí. Jae co Jacobo, José, Judas jare Simón tiqueí. Jare jindi reta yugüireco vi yandepite pe —jei reta.

Jáeramo jae reta pochi Jesúś pe. ⁴ Jayave Jesúś jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta, jentarā reta jare jenta pegua reta uipiu'ã reta —jei.

⁵ Jare joco pe ipuere'ã uyapojeta miacañi. Jaeño oñono ipo mboví imbaerasi vae reta re umbigüera vaerā. ⁶ Jare Jesús ipiacañi jese reta, güirovia'ã jese ramo.

Jayave Jesús oo oporomboe ūru tenta guasu-rai jocoropi ñugüinoui vae reta rupi.

*Jesús omundo jocua doce jemimboe reta
(Mt 10.5-15; Lc 9.1-6)*

⁷ Penti ara Jesús umbatí jocua doce jemimboe reta, jare omundo mocui mocui rupi, jare umee chupe reta mbaepuere umbisiri vaerā aña reta oya jese vae reta güi. ⁸ Jare oyocui:

—Peo yave, agüiye mbae peraa, jaeño pepopoca. Agüiye peraa peurupucu, perembiurā jare corepoti —jei chupe reta —. ⁹ Pemonde pepipasa, jare agüiye peraa mocui camisa —jei.

¹⁰ Jare jei vi chupe reta:

—Peo pevæe yave penti tenta pe, joco pe peñ, jocua tenta guasu güi peo ye regua —jei—. ¹¹ Jare ime yave penti tenta guasu pegua reta uipota'ã pepita vaerā joco pe jare uipota'ã uyapisaca peré vae, pecuaño joco güi, jare pemítimo ivicuji pepi güi, uicuaa vaerā jae reta co teco güinoui —jei—. Añete che jae peve, Tumpa uña yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei.

¹² Jayave jae reta yugüiraa, jare umimbeu ūru vae reta pe:

—Peeya piyemingueta icavi mbae vae pepia pe oñ vae.

13 Jare jae reta umbisiri jeta aña reta oya jese vae reta güi, jare jeta imbaerasi vae reta re oñono aceite umbigüera vaerā.

Juan imano

(Mt 14.1-12; Lc 9.7-9)

14 Opaete vae uyandu ma Jesús regua. Mburuvicha guasu Herodes jee vae uyandu vi. Jae jei:

—Juan upurumbibautizase vae icove ye ma ou umanocue vae reta ipite güi. Jáeramo uyapo cua miacañi reta —jei.

15 Íru vae reta jei:

—Jae co Elías.

Jare íru vae reta jei:

—Jae co penti Tumpa iñee umimbeu vae Tumpa iñee aracae umimbeu vae ramí.

16 Ërei Herodes uyandu yave, jei:

—Jae co Juan añacasiaca vae. Icove ye ma ou umanocue vae reta ipite güi —jei.

17 Echa'ã ndei Juan umano mbove, Herodes umenda Felipe jembireco Herodías jee vae ndive. Felipe co jae Herodes tivi. Jayave Herodes omondo uipísica Juan, jare oñonoca peresoríru pe, Herodías jei ramo. **18** Echa'ã tenonde yave Juan jei Herodes pe: “Icavi'ã nemenda vaerā nderívi jembireco ndive.”

19 Jáeramo Herodías pochi Juan pe, jare uipota tēi uyucaca, ërei ipuere'ã. **20** Echa'ã Herodes uicuua Juan co jae cuimbae jupi vae. Jáeramo uipiu, jare umaenyo'ã quía re uyapo vaerā icavi mbae vae chupe. Jare uyandu yave Juan jei vae, uyemipa'ã tuicha. Ërei jecuaeño uipota uyapisaca jese. **21** Ërei uvæa ara Herodías uyapo vaerā icavi

mbae vae Juan pe. Jocua ara Herodes uyembíara oa vae regua, jare umbatíca ūru mburuvicha reta, sundaro reta juvicha reta, jare icocatu vae reta Galilea pegua, umingaru vaerā. ²² Jare Herodías imembí cuña uique upirae yave, umbiyerovia Herodes jare jae ndive ucaru ūlugüinói vae reta. Jayave Herodes jei cuñatai pe:

—Eeca cheve mbae ndipota vae, jare che ameeta ndeve —jei.

²³ Jare jei ye chupe Tumpa jee re:

—Ipotave mbae ndeeca cheve vae ameeta co ndeve, cheíví mbite rupi yepe.

²⁴ Jayave cuñatai oẽ oo upirandu ichí pe:

—¿Mbae pa aecata chupe?

—Eeca chupe Juan upurumbibautizase vae iñáca —jei ichí chupe.

²⁵ Jayave imambaeño cuñatai uique ye mburuvicha guasu oĩ vae pe.

—Aipota nemee vaerā cheve añave voi Juan upurumbibautizase vae iñáca penti plato pe —jei chupe.

²⁶ Jayave mburuvicha guasu ipiatiti tuicha. Êrei Tumpa jee re jei chupe ramo, jare ūru vae reta uyandu ramo, uipota'ã uicuacu iñee. ²⁷ Jáeramo omundo sundaro Juan iñáca güeru vaerā. ²⁸ Jayave oo sundaro peresoríru pe uñácasia Juan. Jare güeru iñácacue penti plato pe, jare umee cuñatai pe. Jayave jae umee ichí pe. ²⁹ Jare Juan jemimboe reta cua uicuua yave, yugüeru güíraa jetecue oñotí vaerā.

*Jesús umingaru cinco mil cuimbæ reta
(Mt 14.13-21; Lc 9.10-17; Jn 6.1-14)*

³⁰ Jesúś jemimondo reta uyembati ye yave jae ndive, umimbeu reta chupe opaete uyapo vae jare oporomboe jese vae. ³¹ Jayave Jesúś jei chupe reta:

—Pe retaño peyu yaa quíi ngatu vae pe, peputuu vaerã michi pegua —jei.

Echa'ã jecuaecuae jeta vae Yugüeru opou ipi. Jáeramo Jesúś jare jemimboe reta iquíi'ã ucaru vaerã. ³² Jayave jae retaño yugüiraa chalana pe quíi ngatu vae pe. ³³ Ërei jeta vae reta uecha yugüiraa, jare uicuaa quía co jae vae. Jare yugüiraa ivi rupiño tenta guasu reta güi Jesúś oo vae pe, jare yugüiraa uvâe ndei Jesúś oo uvâe mbove, jare uyembati joco pe. ³⁴ Jesúś ugüeyi yave chalana güi, uecha jeta vae, jare ui parareco reta. Echa'ã jae reta ovecha mbaeti iyandarecoa güinoi vae reta rami co. Jare umbipi omboe reta jeta mbaembae re.

³⁵ Caaru ma yave, Jesúś jemimboe reta Yugüeru jei chupe:

—Mbaeti quiave ico cua rupi, jare caaru ma oĩ.

³⁶ Emundo cua reta ogua vaerã jembiurã tenta tenta rupi. Echa'ã mbaeti mbae jou reta vaerã cua pe —jei reta.

³⁷ Ërei Jesúś jei chupe reta:

—Pe reta pemee tucaru.

—¿Ndoota pa ndogua doscientos ara mbaravíqui jepi pegua mbiyape, numee jou reta vaerã? —jei reta chupe.

³⁸ Jesúś jei chupe reta:

—¿Mboví pa mbiyape ime penoi? Pecua peeca —jei.

Jae reta uicuaa ma yave, umimbeu Jesúś pe:

—Ime nonoi pandepo mbiyape jare mocui pira
—jei reta.

³⁹ Jayave Jesús oyocui opaete vae uyembatimbatí vaerã uguapi capiichape re. ⁴⁰ Jayave uyembatimbatí reta uguapi cien rupi jare cincuenta rupi. ⁴¹ Jayave Jesús uipisi jocua pandepo mbiyape jare mocui pira, jare umae ara cotí, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati yati ñugüinói vae reta pe. Jesús upisãa vi jocua mocui pira, uñemee vaerã opaete vae pe. ⁴² Opareve ucaru, jare iyangapíi reta. ⁴³ Jayave Jesús jemimboe reta umbati tembiú uñepisãacue jembire vae, jare umitínee doce canasta. ⁴⁴ Jare ucaru vae reta güi cuimbae retaño uyepapa cinco mil.

Jesús uguata i íárambo
(Mt 14.22-27; Jn 6.16-21)

⁴⁵ Jare jupivoiño Jesús oyocui jemimboe reta uyupi vaerã chalana pe, jare yugüiraa vaerã jenonde i guasu jobaicho pe tenta guasu Betsaida pe, jae omondo rambueve uyembati vae reta. ⁴⁶ Jare opa omondo yave, Jesús uyupi ivitu guasu re uyerure vaerã Tumpa pe. ⁴⁷ Pítu ma yave, jemimboe reta yugüiraa chalana pe i guasu mbite rupi, jare Jesús jaeño upita ivi pe. ⁴⁸ Jare Jesús uecha tanta ma uparaviqui reta, uruguata vaerã chalana. Echa'ã ivitu tanta oováiti. Jare cõeta ma yave, Jesús uguata oo i íárambo rupi güiraa uepití. Jare uasata tẽi chugüi reta. ⁴⁹ Jae reta uecha yave uguata oo i íárambo rupi, ipia pe uyemingueta tẽi uecha mbae iãcue, jare usapicai reta. ⁵⁰ Echa'ã

opaete jae reta uecha, jare uquiyé ete reta. Êrei jupivoiño Jesús ombou iñee chupe reta:

—Piñemiatangåtu. Che co. Agüiye pequiyé —jei.

⁵¹ Jayave Jesús ou uyupi chalana pe, jare upita ivitu. Jare jae reta ipiacañi. ⁵² Echa'ã jocua miacañi mbiyape regua uyapo yave, Jesús uipota tẽi jae reta uicuaa cavi vaerã. Êrei ndeiño uicuaa. Echa'ã jecuaeño ipiatanta.

Jesús umbigüera Genesaret pegua imbaerasi vae reta

(Mt 14.34-36)

⁵³⁻⁵⁴ I guasu uasa reta yave, yugüiraa uvãe ivi Genesaret pe. Jare ugüeyi reta yave chalana güi i guasu jembei pe, jupivoiño joco pegua reta uicuaa jae co Jesús vae. ⁵⁵ Jare yugüiraa opaete jocua ivi rupi, jare umbipi güeru imbaerasi vae reta jupa reve Jesús oĩ vae pe. Iru vae reta umimbeu chupe reta quiape oĩ vae. ⁵⁶ Jare Jesús oo tenta guasurai reta rupi, jare tenta guasu reta rupi, jare tenta ñana rupi ñugüinoi vae reta pe. Jare oo vae rupi joco pegua reta güeru oñono imbaerasi vae reta tape rupi, jare uyerure Jesús pe umaeño imbaerasi vae reta uyavíqui vaerã jemimonde jembei yepe. Jare opaete uyavíqui vae reta ucuera.

7

Yandepia uminguia vae

(Mt 15.1-20)

¹ Fariseo reta jare amocue mboroyocui re oporomboe vae Jerusalén güi yugüeru vae reta uyembati Jesús oĩ vae pe. ² Jae reta uecha amocue Jesús jemimboe reta ucaru ñugüinoi uyepoe mbae

reve. Echa'ã jae reta uyapo ve'ã ma itenondegua reta iporomboe. Jáeramo umbijeco reta. ³ Echa'ã fariseo reta jare opaete judío reta uyepoeñoi ndei ucaru mbove, uyapo vaerã itenondegua reta iporomboe. ⁴ Jare yugüeru ye yave umaemee vae reta ñugüinpoi vae güi, jecuaeñio uyepoe ndei ucaru mbove. Jare uyapoñoi reta jeta ñru mbaembae itenondegua reta iporomboe. Echa'ã oyoe vaso reta, yapepo reta, paila reta jare tupu reta. ⁵ Jayave fariseo reta jare mboroyocui re oporomboe vae reta upirandu Jesús pe:

—¿Maera pa nderemimboe reta uyapo'ã yandetenondegua reta iporomboe? ¿Maera pa ucaru reta uyepoe mbae reve? —jei reta.

⁶ Jayave Jesús jei chupe reta:

—Añete yepe Isaías imiari peré. Echa'ã jae uicuatía upurumbítaví vae reta re cuarãi:

‘Cua reta chepiu iyuru peño’ —jei Tumpa—.

‘Erei ipia pe chepiu'ã etei.

⁷ Chembiadadora-raangaiño.

Che jucuarãi'ã aporoyocui’ —jei Tumpa.

Jucuarãi uicuatía Isaías —jei Jesús—. ⁸ Echa'ã pe reta piyapo'ã Tumpa iporoyocui, ërei piyapo cavi yandetenondegua reta iporomboe. Piyoe yapepo reta jare vaso reta, jare jeta cua nunga piyapo —jei.

⁹ Jare Jesús jei chupe reta:

—Tumpa iporoyocui pemombo co, piyapo vaerã yandetenondegua reta iporoyocui.

¹⁰ Moisés jei cuarãi: ‘Ipíu nderu jare ndesi.’ Jare jei vi cuarãi: ‘Jei icavi mbae vae tu ani ichí cotí vae uyeyucacata co.’ Jucuarãi jei Moisés —jei

chupe reta—. ¹¹ Êrei pe reta pere cuarãi: ‘Penti cuimbae ipuere jei tu ani ichi pe umeeta tẽi chupe ombori vaerã vae Corbán co.’ Jucuarãi pere — jei—. (Corbán uipota jei: “Amee ma Tumpa pe”.) ¹² Jayave pe reta pemaeño'ã ma jese ombori vaerã tu jare ichi —jei—. ¹³ Jare jeta cua nunga piyapo. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui. Jare pemboe vi pesambiai reta uyapo vaerã yandetenondegua reta iporoyocui —jei Jesús chupe reta.

¹⁴ Jare Jesús ueni umbati opaete joco pe ñugüinói vae reta.

—Piyapisaca cua re opaete pe reta, picuua cavi vaerã —jei chupe reta—. ¹⁵ Ipotave mbae peu vae oo perie pe. Jáeramo uminguia'ã pepia. Jocua piyapo vae jare pere vae uminguia pepia —jei—. ¹⁶ Uipota uyandu vae tuyapisaca cua ñee re —jei chupe reta.

¹⁷ Jare Jesús ueya yati vae reta yave, uique jo pe. Jayave jemimboe reta upirandu chupe umijaanga reve jei vae re. ¹⁸ Jayave Jesús jei chupe reta:

—¿Pe retave pa picuua cavi'ã? Picuua cavi cua: Ipotave mbae peu vae uminguia'ã pepia. ¹⁹ Echa'ã oo'ã pepia pe. Oo perie pe jare pemombo. Jucuarãi uyeyapo opaete tembíu pe —jei chupe reta.

²⁰ Jare Jesús jei:

—Jocua piyapo vae jare pere vae uminguia pepia. ²¹ Echa'ã pepia güi oẽ opaete icavi mbae vae: pepia pe piyemingueta icavi mbae vae, piyuvanga menda re, piyapo aguasa, pepuruyuca, ²² pemonda, pipota ūru vae reta imbaembae, piyapo icavi mbae vae, pepurumbitavi,

pembiquere, peacatāa, icavi mbae vae pere perapicha coti, piyembicāte jare pico iyaracuaa mbae vae reta rami —jei—. ²³ Opaete cua icavi mbae vae oẽ pepia güi. Jare cua reta uminguia pepia —jei chupe reta.

*Cuña sirofenicia pegua ipurugüirovia
(Mt 15.21-28)*

²⁴ Jayave Jesús oo ye joco güi Tiro jare Sidón iyipi rupi. Jare uique yave penti tenta pe, uipotaã tēi quiave uicuaa vaerā jae joco pe oĩ vae. Ërei uicuaañoi joco pegua reta. ²⁵ Jare penti cuña aña oya imembí cuña re vae uyandu Jesús regua, jare ou uyeatica jae jovai. ²⁶ Jae co penti sirofenicia griega pe uyemingueta vae. Jae uyerure Jesús pe umbisiri vaerā aña imembí güi. ²⁷ Ërei Jesús jei chupe:

—Tiangapii rani sambiai reta. Icavi'ã yaequi vaerā tembiú sambiai reta güi, ñamee vaerā yimbarrai reta pe —jei.

²⁸ —Añete tēi co, carai —jei cuña Jesús pe —. Ërei yimba-rai mesa igüi pe ñugüinoi vae reta jou tembiú usururucue sambiai reta uití vae —jei.

²⁹ Jayave Jesús jei chupe:

—Cua ndere vae jeco pegua ndepuere ndeo. Aña usiri ma nemembí güi —jei.

³⁰ Jayave cuña oo uvāe jenta pe yave, uecha imembí jupa pe oĩ. Aña usiri ma chugüi.

*Jesús umbigüera cuimbae iupaupa jare iyapisa
mbae vae*

³¹ Jayave Jesús ou Tiro iyipi rupigua güi, jare uasa Sidón jare Decápolis rupi, jare ou uvāe i guasu

Galilea pe oĩ vae pe. ³² Jare amocue vae güeru chupe penti cuimbae iupaupa jare iyapisa mbae vae. Güeru vae reta uyerure Jesús pe oñono vaeraã ipo jese. ³³ Jayave Jesús güiraa cuimbae yati vae reta ipite güi. Oñono ipoãca cuimbae iyapisa pe. Jayave undiví, jare uyavíqui cuimbae icü chugüi. ³⁴ Jayave umae ara coti, jare iañeequi, jare jei:
—¡Efata! (Cua uipota jei: “¡Iyepea!”)

³⁵ Jayave cuimbae uyandu ma, jare icü omi cavi, jare uyemingueta cavi ma. ³⁶ Jayave Jesús oyocui reta agüiye vaerã umimbeu quia pe. Êrei yepe tẽi oyocui ye ye, jeseve jae reta umimbeuñoi ūru vae reta pe. ³⁷ Jae reta ipiacañi ete, jare jei:

—Opaete mbaembae uyapo vae icavi ete co. Umbigüera iyapisa mbae vae reta uyandu vaerã, jare umbigüera vi upa reta uyemingueta vaerã.

8

Cuatro mil ucaru vae reta (Mt 15.32-39)

¹ Penti arajeta uyembati yave, mbaeti ma mbae güinoi reta jou vaerã. Jayave Jesús ueni jemimboe reta.

² —Aiparareco cua yati vae reta —jei—. Echa'ã mbapi ara ma ñugüinoi che ndive, jare mbaeti ma mbae güinoi jou vaerã —jei jemimboe reta pe—.

³ Amondo yave jenta coti ucaru mbae reve, ipituta co reta tape rupi. Echa'ã amocue yugüeru mbiri güi —jei chupe reta.

⁴ —¿Quiräita pa yandepuere ñamee mbiyape chupe reta cua mbaeti quiave ico vae pe? —jei jemimboe reta Jesús pe.

⁵ Jayave Jesús upirandu chupe reta:

—¿Mboví pa mbiyape penoi?
—Ime nonoi siete —jei reta chupe.

⁶ Jayave Jesús oyocui yati vae reta uguapi vaerã ïví pe. Jayave uipisi jocua siete mbiyape, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati vae reta pe. Jayave jucuarã uyapo reta. ⁷ Jare güinoi vi mboví pira michi vae reta. Cua re vi Jesús umee yasurupai Tumpa pe, jare jei jemimboe reta pe cua vi umee vaerã yati vae reta pe. ⁸ Opareve ucaru, jare iyangapíí reta. Jayave Jesús jemimboe reta umbati tembíu uñepisãacue jembire vae, jare umitínee siete canasta. ⁹ Jare joco pe ñugüinoi vae reta uyepapa cuatro mil rupi. Jayave Jesús omondo ye yati vae reta. ¹⁰ Jayave jae jare jemimboe reta uyupi chalana pe, jare yugüiraa ïví Dalmanuta jee vae pe.

Fariseo reta uipota uecha miacañi

(Mt 16.1-4; Lc 11.29; 12.54-56)

¹¹ Jayave yugüeru fariseo reta, jare umbipi uyeaca Jesús ndive.

—Eechaca oreve miacañi ara güi —jei reta chupe.

Jae reta uipota uicuua uyapota ra miacañi chupe reta. ¹² Jayave Jesús iañeequi.

—¿Maera pa añave yugüireco vae reta uipota aechaca vaerã chupe reta miacañi? —jei—. Añete che jae peve, ndarau uyeechaca miacañi cua reta pe —jei chupe reta.

¹³ Jayave Jesús ueya reta, jare uyupi ye chalana pe oo i guasu jovaicho pe.

*Fariseo reta ilevadura
(Mt 16.5-12)*

¹⁴ Jare Jesús jemimboe reta ñacañí güeru vaerã mbiyape. Pentiño mbiyape güinoi chalana pe.

¹⁵ Jare Jesús jei chupe reta:

—Piñemoa ngatu fariseo reta jare Herodes ilevadura güi.

¹⁶ Jayave jemimboe reta jei uyupe:

—Cua jei, yaru'ã mbiyape ramo.

¹⁷ Jesús uicuaa chugüi mbae jei reta vae, jare jei chupe reta:

—¿Maera pa piyemingueta mbiyape peru mbae vae re? ¿Ndeiño pa picuaa cavi? ¿Tanta mbate pa co pepia? —jei—. ¹⁸ Peresa jare peapisa penoi. ¿Peecha'ã pa jare piyandu'ã pa? ¿Pemandua'ã pa? —jei—. ¹⁹ Cue yave apisãa pandepo mbiyape, ucaru vaerã cinco mil vae reta. Tembíu jembirecue pembati yave, ¿mbovi canasta pa pemítinee? —jei.

—Numítinee doce —jei reta chupe.

²⁰ —Jare siete mbiyape apisãa vi, ucaru vaerã cuatro mil vae reta. Tembíu jembirecue pembati yave, ¿mbovi canasta pa pemítinee? —jei Jesús.

—Numítinee siete —jei reta chupe.

²¹ Jayave Jesús jei chupe reta:

—¿Ndeiño pa picuaa cavi?

Jesús umbigüera jesa mbae vae Betsaida pe

²² Jare yugüiraa uvãe Betsaida pe. Jayave amocue vae güeru Jesús pe cuimbae jesa mbae vae, jare jae reta uyerure chupe oñono vaerã ipo jese.

²³ Jayave Jesús uipoco güiraa cuimbae jesa mbae vae tenta guasu güi. Jayave undiví cuimbae jesa re, jare oñono ipo jese.

—¿Ndepuere pa mbae ndeecha? —jei chupe.

²⁴ Cuimbae umae.

—Cuimbae reta aecha —jei Jesús pe—. Êrei ivíra reta echa cheve. Êrei aecha uguata ñugüïnoi —jei.

²⁵ Jayave Jesús oñono ye ipo jesa re, uecha cavi vaerã. Jayave ramo uecha cavi opaete mbaembae.

²⁶ Jayave Jesús oyocui:

—Agüiye ecua cua tenta guasu rupi. Jare agüiye emimbeu quía pe ave jocoropi —jei chupe.

Jayave omondo jenta pe.

*Pedro jei Jesús co jae Cristo, Tumpa ombou vae
(Mt 16.13-20; Lc 9.18-21)*

²⁷ Coiño tenta guasu Cesarea Filipo güi ñugüïnoi amocue tenta guasu-rai reta. Jocotí yugüiraa Jesús jare jemimboe reta. Jare tape rupi Jesús upírandu jemimboe reta pe:

—¿Quía pa co che ūru vae reta pe?

²⁸ Jae reta umimbeu chupe:

—Amocue vae jei nde co jae Juan upurumbibautizase vae, jare ūru vae reta jei nde co jae Elías, jare ūru vae reta jei nde co jae penti Tumpa iñee aracae umimbeu vae —jei reta.

²⁹ Jayave Jesús upírandu chupe reta:

—Jare ¿quía pa co che peve?

Jayave Pedro jei chupe:

—Nde co jae Cristo, Tumpa ombou vae.

³⁰ Jayave Jesús oyocui reta agüiye vaerã umimbeu quía pe.

*Jesús umimbeu umanota co
(Mt 16.21-28; Lc 9.22-27)*

³¹ Jayave Jesús umimbeu chupe reta:

—Che cuimbaerã ayeyapo vae jetata co aiporara. Jare tenta guasu pegua reta itenondegua reta, sacerdote reta itenondegua reta, jare mboroyocui re oporomboe vae reta chererírota jare cheyucacata. Êrei mbapi ara rupi aicove yeta ayu umanocue vae reta ipite güi —jei chupe reta.

³² Cua umimbeu cavi chupe reta. Jayave Pedro güiraa Jesús ūru reta ipite güi, jare umbipi umbieta chupe. ³³ Êrei Jesús uyerova umae ūru jemimboe reta coti, jare uñengata Pedro pe.

—Esiri chegüi, Satanás —jei chupe —. Echa'ã nde ndiyemingueta neĩ ivi pegua reta uyemingueta rami, ndiyemingueta'ã Tumpa uyemingueta rami —jei.

³⁴ Jare Jesús ueni jemimboe reta jare ūru joco pe ñugüinoi vae reta. Jayave jei chupe reta:

—Ime yave quía uipota oo cherupié vae, tiñacañi iyugüi, tovoi icurusu, jare too cherupié —jei—.

³⁵ Uipota uñuvatu jecove vae ndarau ipuere. Êrei jocua umeeta jecove chereco pegua jare Tumpa iñee icavi vae jeco pegua vae uñuvatuta co —jei—.

³⁶ ¿Mbae ra uminganata quía, umingana yave opaete ivi pegua, êrei ipuere'ã yave uñuvatu jecove? ³⁷ ¿Mbovi ra umbiepitá quía ogua ye vaerã jecove? —jei—.

³⁸ Ivi pegua añaive yugüireco vae reta güirovia'ã Tumpa jare uyapo icavi mbae vae. Ime yave quía imara cheré jare chiñee re cua reta ipite pe vae, che cuimbaerã ayeyapo vae chemarata vi jese, ayu ye yave cheRu imbaepuere reve ángel uñeñono tee Tumpa peguarã vae reta ndive —jei chupe reta.

9

¹ Jesúś jei chupe reta: —Añete che jae peve, ndei amocue cua pe ñugüïnoi vae umano mbove, uechata reta Tumpa iporoyocuia mbaepuere pegua.

Jesús uyembíambie
(Mt 17.1-13; Lc 9.28-36)

² Seis ara ma uasa yave, Jesúś güïraa Pedro, Jacobo jare Juan íru reta ipite güi penti ivítu guasu ivate vae re, jare joco pe uyembíambie jae reta jovai. ³ Jemimonde umbípi uvera jare tñ asi. Mbaeti penti ave umbaepuuta vae ipuere umitñ asi ju-cuarñ. ⁴ Jare uyecuua chupe reta Elías jare Moisés uyeminguela ñugüïnoi Jesúś ndive. ⁵ Jayave Pedro jei Jesúś pe:

—Oporomboe vae, icavi co ñaī vaerā cua pe. Nduyapota mbapi guarasña ñanaroqui pegua, penti nembaerā, penti Moisés peguarā jare penti Elías peguarā —jei.

⁶ Echa'ã Jesúś jemimboe reta uquiyete, jare Pedro uicuaa'ã mbae jei vaerā. ⁷ Jayave ou amapítu umiguarasña reta, jare amapítu güi uyendu ñee jei:

—Cua co jae cheRaí aau ete vae. Piyapisaca jese —jei.

⁸ Jare aramoiño umae reta yave, uecha'ã ma quía jae reta ndive, jaeño Jesúś.

⁹ Jare ivítu guasu güi ugüeyi yugüeru rambueve, Jesúś oyocui reta:

—Agüiye pemimbeu quía pe cua pеechea vae, ndei che cuimbaerā ayeyapo vae aicove ye ayu umanocue vae reta ipite güi mbove —jei chupe reta.

10 Jáeramo umimbeu'ã quía pe, ērei upirandu reta uyupe:

—¿Mbae pa uipota jei cua umimbeu yandeve vae? ¿Quirāita pa icove ye ou umanocue vae reta ipite güi? —jei reta.

11 Jayave jae reta upirandu Jesús pe:

—¿Maera pa jei mboroyocui re oporomboe vae reta Elías rani co outa?

12 —Añete Elías rani co outa —jei Jesús chupe reta—, jare opaete uyapicatuta. Jare ¿mbae ra uye-cuatía oĩ Tumpa iñee pe che cuimbaerā ayeyapo vae re? Uyecuatía oĩ che jetata aiporara jare ūru vae reta chererīrota —jei—. **13** Ērei che jae peve, Elías ou ma co, jare amocue vae uyapo chupe jae reta uipota vae, Tumpa iñee pe uyecuatía oĩ rami —jei chupe reta.

*Jesús umbigüera cunumi aña oya jese vae
(Mt 17.14-21; Lc 9.37-43)*

14 Jare yugüeru uvae yave ūru jemimboe reta ñugüinoi vae pe, uecha jeta yati ñugüinoi iyipi rupi, jare mboroyocui re oporomboe vae reta uyeaca ñugüinoi jae reta ndive. **15** Jayave opaete joco pe ñugüinoi vae reta uecha Jesús, jare ipiacañi reta. Jayave osi yugüeru reta icoti, jare umbisaluda reta.

16 Jayave Jesús upirandu chupe reta:

—¿Mbae re pa piyeaca peñi jae reta ndive?

17 Jayave penti cuimbae yati vae reta ipite pe oĩ vae jei chupe:

—Oporomboe vae, aru ndeve cherai. Aña oya jese jare umbuupa —jei—. **18** Jare que rupi oĩ vae pe aña oya jese yave, joco pe umbiriri, jare cunumi iyuru tiriayi, jāi umbiquiriri jare jete opa

uñemítanta —jei—. Ayerure tēi ma nderemimboe reta pe umbísiri vaerā aña chugüi, ērei ipuere'ã reta —jei cuimbae Jesús pe.

¹⁹ Jayave Jesús jei chupe reta:

—Pe reta cua ivi pe pico vae pepurugüirovia'ã. ¿Quirāi regua ra apitata pe reta ndive? ¿Quirāi regua ra arupiata peve? Peru cheve cua pe jocua cunumi —jei.

²⁰ Jayave güeru chupe, jare aña uecha yave Jesús, jupivoiño umbírirí tanta jocua cunumi jare oa ivi re. Uyapayere, jare iyuru tiryai. ²¹ Jayave Jesús upírandu tu pe:

—Quirāi yave ma pa uyeyapo chupe cua?

—Michi güive uyeyapo chupe —jei tu—. ²² Jare jeta vese ma uití tata pe jare i pe, uyuca vaerā tēi. Ērei nde ndepuere yave mbae ndiyapo chupe, oreparareco jare oremborí —jei chupe.

²³ Jayave Jesús jei chupe:

—¿Ndepuere pa ndepurugüirovia? Upurugüirovia vae ipuere uyapo opaete mbaembae —jei.

²⁴ Jayave cunumi tu iñeeäta reve jei:

—Ndugüirovia. Apurugüirovia'ã yave, chemborí apurugüirovia vaerā —jei.

²⁵ Jare Jesús uecha yave jeta vae uyembati joco pe, uñeengata aña pe.

—Aña upurumbuupa jare upurumbiapisa mbae vae, che ndoyocui ndesiri vaerā cua cunumi güi, jare agüye etei ma eya ye jese —jei aña pe.

²⁶ Jare aña jāse ma yave, umbírirí tanta cunumi, jare usirí chugüi. Jare cunumi umano echa upita. Jare jeta joco pe ñugüinoi vae reta jei tēi:

—Umano ma.

²⁷ Ërei Jesús uipisi cunumi ipo pe, jare umupūa. Jare cunumi uyemboi. ²⁸ Jare Jesús uiqe yave penti o pe, jemimboe reta upirandu chupe, jae retaño jae ndive ñugüinoi yave:

—¿Maera pa ore orepure're'ã numbisiri aña?

²⁹ —Ndaraú pepuere pembisiri cua nunga aña, jaeño piyerure yave Tumpa pe piyecuacu reve tembíu güi —jei Jesús chupe reta.

Jesús umimbeu ye umanota co

(Mt 17.22-23; Lc 9.44-45)

³⁰ Jesús jare jemimboe reta yugüiraa yave joco güi, uasa Galilea rupi. Jare Jesús uipota'ã quía uicuua vaerā. ³¹ Echa'ã omboe güinoi jemimboe reta.

—Che cuimbaerā ayeyapo vae penti vae chemeeta ūru vae reta pe. Jae reta cheyucata —jei chupe reta—. Ërei amano ma yave, mbapi ara rupi aicove yeta ayu umanocue vae reta ipite güi —jei.

³² Ërei jae reta uicuua cavi'ã mbae re ra Jesús umingueta vae, jare uipiú reta upirandu vaerā chupe jese.

¿Quía ra tenondegua ūru reta güi vae?

(Mt 18.1-5; Lc 9.46-48)

³³ Jayave yugüiraa uvāe Capernaum pe. Jare jenta pe oī yave, Jesús upirandu jemimboe reta pe:

—¿Mbae re pa piyemingueta peyu tape rupi?

³⁴ Ërei jae reta iquñiño. Echa'ã tape rupi jae reta uyemingueta yugüeru quía ra tenondegua ūru reta güi vae. ³⁵ Jayave Jesús uguapi, jare ueni jocua doce jemimboe reta. Jayave jei chupe reta:

—Ime yave quía uipota tenondeguarã ico vae, tuñemimichi opaete vae güi, jare tuyeyocui opaete ūru reta pe —jei.

³⁶ Jayave ueni penti sambiai, jare oñono jae reta ipite pe. Jayave uicuāva sambiai, jare jei chupe reta:

³⁷ —Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

*Oyovaicho'ã yande ndive vae yanembori co
(Mt 10.42; Lc 9.49-50)*

³⁸ Jayave Juan jei Jesús pe:

—Oporomboe vae, nduecha penti cuimbae nderee pe umbisiri aña reta oya jese vae reta güi, jare ndoe chupe agüiye ma uyapo vaerã. Echa'ã jae ñaneíru'ã co —jei.

³⁹ —Agüiye pere chupe jucuarãi —jei Jesús chupe—. Echa'ã cheree pe miacañi uyapo vae ndarau jupivoiño jei icavi mbae vae checoti —jei—. ⁴⁰ Echa'ã oyovaicho'ã yande ndive vae yanembori co —jei—. ⁴¹ Aramoi quía umeeta peve penti vaso i cheree pe vae. Jucuarãi uyapo yave cheré perovia ramo, añete che jae peve, ambijecoviata co chupe —jei—.

*Mbaeyoa uyapoca vae
(Mt 18.6-9; Lc 17.1-2)*

⁴² Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tēi co ūru vae reta uñapiti vaerã iyayu re penti ita tuicha vae umbaesopipe vae, jare omombo vaerã i guasu pe —jei chupe reta—. ⁴³ Ndepo

jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoí vaerã ndepo jovaicho mbae reve, tata guasu opa mbae vae pe mocui ndepo reve ndeo vaerã tẽi güi —jei—. ⁴⁴ Echa'ã tata guasu pe taso ndarau umano, jare tata ndaraus ove —jei—. ⁴⁵ Jae ramiño vi ndepi jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoí vaerã ndepi jovaicho mbae reve, tata guasu opa mbae vae pe mocui ndepi reve Tumpa nemondo vaerã tẽi güi —jei—. ⁴⁶ Tata guasu pe taso ndaraus umano, jare tata ndaraus ove —jei—. ⁴⁷ Jae ramiño vi nderesa jovaicho uyapoca yave mbaeyoa ndeve, eequi ndiyugüi. Icavi co ndico vaerã Tumpa iporoyocuia pe nderesa jovaicho mbae reve, tata guasu pe mocui nderesa reve Tumpa nemondo vaerã tẽi güi —jei—. ⁴⁸ Tata guasu pe taso ndaraus umano, jare tata ndaraus ove —jei— ye chupe reta—. ⁴⁹ Echa'ã tata uñeñonocata opaete re, yuqui uñeñonoca tembiú pe rami. Yuqui uñeñonocata vi opaete maemimba Tumpa pe uyeyuca vae re —jei—. ⁵⁰ Yuqui icavi co yau vaerã. Êrei jembochi'ã ma yave, ¿quiräita ra jembochi ye? —jei—. Piyapo yuqui uyapo rami, jare pico cavi pâve —jei chupe reta.

10

*Umenda vae uyemombo vae reta
(Mt 19.1-10; Lc 16.18)*

¹ Jayave Jesús oo joco güi Judea pe Jordán jovai-cho pe. Joco pejeta uyembati ye jae oï vae pe. Jayave Jesús omboe reta, jecoño mai uyapo rami.

² Jayave fariseo reta Yugüeru Jesús oĩ vae pe. Jae reta uipota tẽi uyavica chupe. Jáeramo upirandu reta chupe:

—Jupi pa cuimbae omombo vaerã jembireco?

³ —Mbae pa peocui Moisés? —jei Jesús chupe reta.

⁴ —Moisés umaeño cuimbae re uicuatía vaerã tupapire jembireco omombo vaerã —jei reta chupe.

⁵ —Moisés uicuatía cua mboroyocui pepiatanta ramo —jei Jesús—. ⁶ Ërei Tumpa uyapo ramo yave, uyapo cuimbae jare cuña —jei—. ⁷ Jáeramo cuimbae usirita tu jare ichi güi, jare oota ico vaerã jembireco ndive —jei—. ⁸ Jare mocui vae uyeyapota penti ramiño. Jáeramo mbaeti ma mocui rami. Yugüireco penti ramiño —jei—. ⁹ Jáeramo agüiye quía tumbisiri Tumpa umíru vae reta —jei chupe reta.

¹⁰ Jare o pe ñugüinói yave, jemimboe reta upirandu ye Jesús pe cua re. ¹¹ Jayave Jesús jei chupe reta:

—Cuimbae omombo jembireco jare umenda íru cuña ndive yave, uyuvanga menda re jembireco omombo vae coti. ¹² Jare cuña usiri ime güi jare umenda íru cuimbae ndive yave, uyuvanga vi menda re —jei.

*Jesús uyerure Tumpa pe sambiai reta re
(Mt 19.13-15; Lc 18.15-17)*

¹³ Jare amocue vae güeru Jesús oĩ vae pe sambiai reta, Jesús oñono vaerã ipo jese reta. Ërei jemimboe reta uñeengata güeru vae reta pe. ¹⁴ Jesús cua uecha yave, pochi jemimboe reta pe, jare jei chupe reta:

—Pemaeño sambiai reta re yugüeru vaerā checoti. Agüiye piyopia. Echa'ã cua nunga uyeyocui Tumpa pe iporoyocuia pe —jei— . ¹⁵ Añete che jae peve, pipota'ã yave Tumpa pe piyeyocui vaerā penti sambiai uipota rami, ndarau pico Tumpa iporoyocuia pe —jei.

¹⁶ Jayave Jesús uicuāva sambiai reta, jare oñono ipo jese reta, jare uyerure Tumpa pe jese reta.

*Cuimbae icocatu vae
(Mt 19.16-30; Lc 18.18-30)*

¹⁷ Jare Jesús joco güi oo yave, penti cuimbae osi ou icoti. Uyeatica Jesús jovai.

—Oporomboe vae, nde ndepiacavi co —jei Jesús pe—. ¿Mbae pa ayapota anoi vaerā tecove opa mbae vae? —jei.

¹⁸ —¿Maera pa ndere cheve chepiacavi vae co? —jei Jesús chupe—. Mbaeti quía ipiacavi, jaeño co Tumpa —jei—. ¹⁹ Nde ndicuaa co mboroyocu reta: ‘Agüiye iyuvanga menda re. Agüiye epuruyuca. Agüiye nemonda. Agüiye ndapu ūru vae re. Agüiye epurumbitavi. Ipiú nderu jare ndesi’ —jei chupe.

²⁰ —Oporomboe vae, ayaví'ã penti ave cua mboroyocu reta chemichi güive —jei cuimbae chupe.

²¹ Jesús umae jese uau reve.

—Ime mbae uata ndiyapo vaerā —jei chupe—. Ecua emee opaete mbaembae nenoí vae corepoti re, jare emee ndecorepoti iparavete vae reta pe, jare ndicocatuta ara pe. Jayave evoí ndecurusu, jare eyu cherupié —jei.

22 Êrei cua uyandu yave, cuimbae oo ipiatiti reve. Echa'ã jeta mbaembae güinoi.

23 Jayave Jesús umae iyipi rupi, jare jei jemimboe reta pe:

—Yavai ete co icocatu vae reta uique vaerã Tumpa iporoyocuia pe.

24 Jemimboe reta ipiacañi Jesús jei vae re. Êrei Jesús jei ye:

—Cherivi reta, yavai ete co icocatu vae reta uique vaerã Tumpa iporoyocuia pe. Echa'ã jei tẽi ipia pe: ‘Icavita co cheve. Echa'ã jeta mbaembae anoi’ —jei, jei Jesús—. **25** Yavai ete icocatu vae uique vaerã Tumpa iporoyocuia pe, maemimba camello jee vae yuu jesacua rupi uasa vaerã güi —jei.

26 Jayave jae reta ipiacañi ete, jare upirandu uyupe:

—Jucuarãi yave, ¿quía pa ipuere uyembiasaca?

27 Jesús umae jese reta jare jei:

—Ívi pegua reta ipuere'ã uyembiasa. Êrei Tumpa ipuere umbiasa reta. Echa'ã Tumpa ipuere uyapo opaete mbaembae —jei chupe reta.

28 Jayave Pedro jei Jesús pe:

—Mase, ore opaete mbaembae ndueya, ndoyu vaerã nderupié.

29 —Añete che jae peve —jei Jesús—, ime yave quía ueya jenta, ani tiqeí reta, ani tiví reta, ani jindi reta, ani tu, ani ichi, ani jembireco, ani isambiaí reta, ani iivi reta chereco pegua jare Tumpa iñee icavi vae jeco pegua vae, **30** cien rupi jecoviata co chupe ívi pe ico rambueve. Jecoviata jenta reta, tiqeí reta, tiví reta, jindi reta, ichi reta, isambiaí

reta jare iivi reta —jei—. Êrei ūru vae reta uyapota icavi mbae vae chupe. Êrei taicue rupi Tumpa umeeta chupe tecove opa mbae vae —jei—. ³¹ Êrei Tumpa umbitaicueta uyembutuicha vae reta, jare umitenondeta uñemimichi vae reta —jei chupe reta.

*Jesús umimbeu ye umanota co
(Mt 20.17-19; Lc 18.31-34)*

³² Jesúsjare jae ndive ñugüinói vae reta yugüíraa tape Jerusalén cotí oo vae rupi, jare Jesústenonde oo. Jare jaicue rupi yugüíraa vae reta ipiacañí jare uquiyé. Jayave Jesúsueni ye jocua doce jemimboe reta ūru reta ipite güi, jare umbipí umimbeu chupe reta mbae uyeyapota oíchupe vae.

³³ —Mase, yaa co ñaí Jerusalén pe —jei chupe reta—. Jare che cuimbaerá ayeyapo vae penti vae chemeeta sacerdote reta itenondegua reta jare mboroyocui re oporomboe vae reta pe. Jae reta jeita amano vaerã, jare chemeeta judío mbae vae reta pe —jei—. ³⁴ Jae reta cheyoyaita, chenupata chicote pe, undívita cheré, jare cheyucata. Êrei mbapí ara rupi aicove yeta ayu umanocue vae reta ipite güi —jei chupe reta.

*Jacobo jare Juan uyerure vae
(Mt 20.20-28)*

³⁵ Cua jaicue rupi Zebedeo tai reta Jacobo jare Juan jee vae yugüeru Jesúscotí jare jei chupe:

—Oporomboe vae, nduipota ndiyapo vaerã oreve nduyerureta ndeve jese vae.

³⁶ —¿Mbae pa pipota ayapo vaerã peve? —jei Jesúsjare chupe reta.

37 —Ndiyembutuichaca yave, emaeño oreré nduguapi vaerã ndeyípi pe, penti ndeacata cotí jare ūru ndeaso cotí —jei reta chupe.

38 —Picuaa'ã mbae re piyerure vae —jei Jesús—. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

39 —Orepuereta co —jei reta.

—Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús—. **40** Êrei chepuere'ã jae peve peguapi vaerã cheyipi pe, penti cheacata cotí jare ūru cheaso cotí. Echa'ã Tumpa umicuatíro ma joco pe uguapita vae reta peguarã —jei chupe reta.

41 Jare ūru diez Jesús jemimboe reta cua uyandu yave, pochi reta Jacobo jare Juan pe. **42** Jayave Jesús ueni reta.

—Picuaa cavi co cua —jei chupe reta—. Mburuvicha íví pegua reta oporoyocui, jare mbaepuere güínoi vae reta jei ūru reta pe mbae uyapo vaerã —jei—. **43** Êrei pe reta agüíye piyapo jucuarã —jei—. Ime yave penti pepite pe oí vae uipota mbaepuere güínoi vae, tuyeyocui ūru reta pe. **44** Jare ime yave penti pepite pe oí vae uipota tenondeguarã ico vae, tuyeyocui ūru reta pe —jei—. **45** Echa'ã che cuimbaerã ayeyapo vae ayu ayeyocui vaerã ūru vae reta pe. Ayu'ã ūru vae reta uyeyocui cheve vaerã. Ayu amano vaerã, jeta vae aepi vaerã —jei chupe reta.

*Bartimeojesa mbae vae ucuera
(Mt 20.29-34; Lc 18.35-43)*

⁴⁶ Jayave yugüiraa uvāe tenta guasu Jericó pe. Jare Jesús oo ye Jericó güi jemimboe reta jare jeta vae reta ndive. Jare Timeo tai Bartimeo jee vae uguapi uyerure oī mbae re tape jembei pe. Bartimeo co jae jesa mbae vae. ⁴⁷ Jare uicuaa Jesús Nazaret pegua uasa oo oī yave, iñeeāta reve jei:

—Cheparareco, Jesús. Nde co jae David iñemoñaa reta pegua —jei.

⁴⁸ Jeta joco pe ñugüinói vae reta uñeengata chupe. Uipota tēi umiquíi. Ërei jae jeiете iñeeāta reve jei:

—David iñemoñaa reta pegua, cheparareco.

⁴⁹ Jayave Jesús uyemboi.

—Peeni —jei.

Jayave ueni reta jesa mbae vae.

—Iñemiatangātu. Epúa. Nereni ma oī —jei reta chupe.

⁵⁰ Jayave jesa mbae vae ueya iyasoya, jare upúa voi oo Jesús cotí. ⁵¹ Jesús upirandu chupe:

—¿Mbae pa ndipota ayapo vaerā ndeve?

—Tamae, oporomboe vae —jei jesa mbae vae.

⁵² Jayave Jesús jei chupe:

—Ndepuere ndeo. Ndecuera ma, nderovia cheré ramo —jei.

Jupivoiño ipuere umae, jare oo Jesús jaicue tape rupi.

11

Jesús uique Jerusalén pe

(Mt 21.1-11; Lc 19.28-40; Jn 12.12-19)

¹ Jare coiño ma Jerusalén güi ñugüinói yave, yugüiraa uvāe tenta guasu-rai reta Betfagé jare

Betania iyípi pe, ivitu guasu Olivos jovai. Jayave Jesús oyocui mocui jemimboe reta:

²—Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae uñeñapíti oĩ. Ndei ave etei quía opo jese. Piyora jare peru —jei—.
³ Jare ime yave quía jei peve vae: ‘¿Maera pa cua piyapo?’ pere chupe: ‘YandeYa uipota uiporu, ērei imambae güeruruca yeta cua pe’ —pere, jei chupe reta.

⁴ Jayave Jesús jemimboe reta Yugüiraa, jare uvãe mburica tairusu vae. Uñeñapíti oĩ tape pe penti onque jovai. Jayave jae reta oyora. ⁵ Jare amocue joco pe ñugüinói vae jei Jesús jemimboe reta pe:

—¿Maera pa piyora peñ mburica?

⁶ Jesús jemimboe reta jei chupe reta Jesús oyocui reta vae. Jayave joco pe ñugüinói vae reta umaeño güiraa vaerã. ⁷ Jayave güeru mburica tairusu vae Jesús oĩ vae pe. Jayave Jesús jemimboe reta oñono iyasoya mburica icupe re, jare Jesús opo jese. ⁸ Jare jeta vae uipiso iyasoya tape rupi mburica jenonde, jare ñru vae reta uyasia ñanaroqui jare oñono tape rupi. ⁹ Jare Jesús jenonde Yugüiraa vae reta jare jaicue rupi Yugüiraa vae reta iñeeäta reve jei:

—¡Icavi co! Tuyembadoraca yandeYa jee re ou vae. ¹⁰ Oporoyocuita yandetenondegua David jee vae oporoyocui rami. Tuyembadoraca. Tei reta ‘icavi co’ ara pe —jei reta.

¹¹ Jare Jesús oo uvãe Jerusalén pe, jare uique Tumpa jo pe. Joco pe umae opaete mbaembae re. Jare caaru ma yave, ou ye Betania pe jocua doce jemimboe reta ndive.

*Iva ía mbae vae
(Mt 21.18-19)*

¹² Piareve pe Yugüiraa ye Betania güi, jare Jesús iyembai. ¹³ Jare mbiri güi uecha penti iva joqui reve, jare oo umae jese ime ra ía. Ërei uecha ia'ã, jaeño joqui. Echa'ã ndei uväe iva ía vaerä.

¹⁴ Jayave Jesús jei iva pe:

—Ndaraau etei ma ndeíá.

Jare jemimboe reta uyandu.

*Jesús Tumpajo pe uyapo vae
(Mt 21.12-17; Lc 19.45-48; Jn 2.13-22)*

¹⁵ Jare Yugüiraa uväe Jerusalén pe. Jayave Jesús uique Tumpa jo pe, jare umbipi omoë joco güi umaemee vae reta jare mbae ogua vae reta, jare umbiyapara corepoti uipecica vae reta imesa reta jare picasu reta umee vae reta jenda reta. ¹⁶ Jare umaeño'ã quía re jivita reve uguata vaerä Tumpa jo rupi. ¹⁷ Jare jei joco pe ñugüinoi vae reta pe:

—Tumpa iñee pe uyecuatía oï cuaräi: ‘Chero uyembijeeta o opaete ivi pegua reta ipuere uyerure Tumpa pe piye vaerä.’ Jucuaräi uyecuatía oï. Ërei pe reta piyapo ma imonda vae reta iñemia rami —jei chupe reta.

¹⁸ Jayave sacerdote reta itenondegua reta jare mboroyocui re oporomboe vae reta cua uyandu yave, ueca quiräi ipuere uyucaca vaerä Jesús. Echa'ã jae reta uquiyé chugüi, opaete vae ipiacañi iporomboe re ramo. ¹⁹ Jare pítuipi yave, Jesús ou ye Jerusalén güi.

*Iva yipi ma
(Mt 21.20-22)*

²⁰ Piareve pe neimbove yave uasa yugüiraa ye yave, uecha iwa yípi ma iyípi güive. ²¹ Jayave Pedro imandúa jese, jare jei Jesús pe:

—¡Emae, oporomboe vae! Iva pe ndere iata'ã ma vae yípi ma —jei.

²² Jesús jei jemimboe reta pe:

—Perovia Tumpa. ²³ Añete che jae peve, yae yave cua ivítu guasu pe: ‘Ecua iyemombo i guasu pe’, jare yae'ã yave yandepia pe: ‘Ndräu ndipo uyeyapo’, ërei yarovia yave yae vae uyeyapota, uyeyapota co yandeve—jei chupe reta —. ²⁴ Jáeramo che jae peve, ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei—. ²⁵ Jare piyerure peñ Tumpa pe yave, pembiasa ūru icavi mbae vae uyapo pecotí vae pe, peRu ara pe oĩ vae umbiasa vaerã vi peve pombaeyoa reta. ²⁶ Ërei pembiasa'ã yave ūru icavi mbae vae uyapo pecotí vae pe, peRu ara pe oĩ vae ndarau vi umbiasa peve pombaeyoa reta —jei.

Jesús imbaepuere

(Mt 21.23-27; Lc 20.1-8)

²⁷ Jare yugüiraa uvâe ye Jerusalén pe. Jare Jesús uguata rambueve Tumpa jo rupi, yugüeru jae oĩ vae pe sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta. ²⁸ Jae reta upirandu chupe:

—¿Mbae nunga mbaepuere pa nenoi cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

²⁹ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã — jei—.³⁰ ¿Quía pa ombou Juan upurumbibautiza vaerã? ¿Tumpa pa ombou? ani ¿iví pegua reta pa ombou? Pemimbeu cheve —jei chupe reta.

³¹ Jayave jae reta jei uyupe:

—Yae yave: ‘Tumpa co ombou’, jae jeita yandeve: ‘Jucuarãi yave, ¿maera pa perovia’ã?’³² Ani ¿yaeta pa: ‘Iví pegua reta co ombou?’ —jei reta.

Êrei jae reta uquiyé tenta guasu pegua reta güi. Echa'ã opaete vae güirovia Juan co jae añetete penti Tumpa iñee umimbeu vae.³³ Jáeramo jei reta Jesús pe:

—Nduicuaa'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta.

12

Co iporúa icavi mbae vae reta

(Mt 21.33-46; Lc 20.9-19)

¹ Jayave Jesús umbipi imiari chupe reta umijaanga reve.

—Ico penti cuimbae icorã uiquëse vae, jare oñoti pípe jeta uva —jei—. Jayave oyoo ivi, jare uyapo uva uitami pípe vaerã. Uyapo vi penti chapa, umae vaerã ivate güi opaete co re. Jayave uiporuca ico ūru vae reta pe, jae reta uyandareco vaerã jese. Jayave co iya oo mbiri ambie ivi pe —jei—.² Jare uva yagüiyé ma yave, co iya ombou penti jembiocui co iporúa reta pe, jae reta umbiyao vaerã tēi uva chupe reta, iya güinói

vaerā imbaerā. ³ Êrei jae reta uipisi uinupa co iya jembiocui, jare omondo ye. Umee'ã etei chupe güíraa vaerā —jei—. ⁴ Jayave co iya ombou ye tēi ūru jembiocui. Êrei co iporúa reta uyapi ita pe umbipere iñaca rupi, jare uyapo reta icavi mbae vae chupe. Jayave omondo ye —jei—. ⁵ Jayave co iya ombou ye tēi ūru jembiocui. Êrei co iporúa reta uyuca cua. Jare jucuarāiñoi uyapo reta jeta ūru co iya jembiocui reta pe. Jae reta uinupa amocue vae, jare uyuca ūru vae reta —jei Jesús—. ⁶ Co iya güínoi jaeño penti tai uau ete vae. Taicue ete ombou cua tai co iporúa reta pe. Co iya jei tēi: ‘Aramoi jae reta uipíuta cheraí’ —jei, jei chupe reta—. ⁷ Êrei co iporúa reta jei uyupe: ‘Cua co jae iyarā vae. Yayuca, jare yande yaicota co iyarā’ —jei reta, jei—. ⁸ Jayave jae reta uipisi co iya tai uyuca omombo co güi —jei—. ⁹ ¿Mbae ra uyapota co iya? —jei—. Outa, opa uyuca vaerā jocua co iporúa reta, jare uiporucata ico ambie vae reta pe —jei Jesús—. ¹⁰ ¿Peminguela'ã pa cua Tumpa iñee pe uyecuatía oĩ vae?

‘Ita tenta iyapoa reta omombo vae uyeyapo ma ita tenondegua vae.

¹¹ YandeYa uyapo cua.

Yaecha ma, jare yandepiacañi jese.’
Jucuarāi uyecuatía oĩ —jei chupe reta.

¹² Jayave jocua uyapisaca jese vae reta uipota tēi uipisi Jesús. Echa'ã uicuaa catu cua umijaanga reve jei vae uicuaaca quirāi jae reta teco güínoi. Êrei uquiyé tenta guasu pegua reta güi. Jáeramo ueyaño, jare yugüíraa.

*¿Jupi pa yambiepi vaerā César pe?
(Mt 22.15-22; Lc 20.20-26)*

¹³ Jayave jae reta ombou amocue fariseo reta jare herodiano reta, uyavica vaerā tēi chupe jae uyemingueta yave. ¹⁴ Jae reta Yugüeru uvāe yave, jei Jesús pe:

—Oporomboe vae, nduicuaa nde ndere vae añete co. Nde nemaе oyovaque opaete pāve re. Nembutuicha'ā penti ave ūru vae güi. Nde ndeporomboe cavi quirāi Tumpa uipota yaico vaerā vae re —jei reta—. César yandeocui yambiepi vaerā chupe corepoti pe. ¿Jupi pa yambiepi vaerā chupe? ani ¿jupi'ā pa? ¿Yambiepita pa chupe? ani ¿yambiepita'ā pa chupe? —jei reta Jesús pe.

¹⁵ Ërei Jesús uicuaa jae reta uipota tēi co umbitavi, jare jei chupe reta:

—¿Maera pa pipota piyavica cheve? Peru cheve penti corepoti taecha —jei.

¹⁶ Jae reta güeru chupe. Jayave jae upirandu chupe reta:

—¿Quía jova íā pa cua? ¿Quía jee pa cua uyecuatiá oī vae? —jei.

—Cua César imbae co —jei reta.

¹⁷ —Pemee César pe César pegua, jare pemee Tumpa pe Tumpa pegua —jei Jesús chupe reta.

Jare jae reta ipiacañi jese.

*¿Icove yeta pa umanocue vae reta?
(Mt 22.23-33; Lc 20.27-40)*

¹⁸ Jayave Yugüeru vi Jesús oī vae pe amocue saduceo reta. Opaete saduceo reta jei umanocue vae reta icove ye'ā co. Saduceo Yugüeru vae reta jei Jesús pe:

19 —Oporomboe vae, Moisés uicuatía ueya yandeve cuarāi: ‘Penti tiquei vae umano yave, jembirecocue mbaeti imembī chupe yave, cuimbae amiri tivī tumenda jocua cuña ndive. Jayave cuña imembī yave, cuimbae tumbijee sambiai tiquei amiri jee pe.’ Jucuarāi uicuatía Moisés —jei reta chupe—. **20** Ico penti cuimbae seis tivī reta güinoi vae. Cua cuimbae umenda, jare umano umimembī mbae reve —jei reta—. **21** Cuimbae amiri jaicue rupigua umenda jembirecocue ndive, ērei umano vi umimembī mbae reve. Jae ramíño vi uyeyapo jaicue rupigua ye pe. **22** Opaete siete reve umenda jocua cuña ndive, jare opaete siete reve umano umimembī mbae reve. Taicue rupi cuña umano vi —jei reta—. **23** Jayave umanocue vae reta icove ye yave, ¿quía nunga vae jembirecorā pa icota jocua cuña? Echa'ã opaete siete reve umenda jae ndive —jei reta.

24 —Pe reta piyavī co —jei Jesús chupe reta—. Echa'ã picuaa'ã Tumpa iñee uyecuatía oĩ vae jare Tumpa imbaepuere —jei—. **25** Echa'ã umanocue vae reta icove ye yave, cuimbae reta jare cuña reta ndaraumenda. Yugüirecota ángel ara pe ñugüinoi vae reta yugüireco rami —jei—. **26** Tamimbeu peve umanocue vae reta regua. Icove yeta co. ¿Peminguela'ã pa Moisés uicuatía vae? —jei—. Uyecuatía oĩ jocua yai regua, jare quirāi Tumpa jei Moisés pe jocua yai jendi vae ipite güi: ‘Che co Abraham, Isaac jare Jacob iTumpa’ —jei, jei chupe reta—. **27** Tumpa mbaeti co umanocue vae reta iTumpa. Jae co tecove güinoi vae reta iTumpa. Tuicha co piyavī —jei.

*Mboroyocui tenondegua vae
(Mt 22.34-40)*

²⁸ Ou vi Jesús oĩ vae pe penti mboroyocui re oporomboe vae. Uyandu uyeaca reta, jare uicuua Jesús umimbeu cavi co chupe reta. Jayave jae upirandu Jesús pe:

—¿Mbae nunga mboroyocui pa co jae tenondegua vae? —jei.

²⁹ Jesús jei chupe:

—Mboroyocui tenondegua vae co cua: ‘Israel pegua, iyapisaca. YandeYa Tumpa, jaeño co Tumpa. ³⁰ Eau ndeYa Tumpa opaete ndepia reve, opaete nderecove reve, opaete ndepiayemingueta reve jare opaete nepirāta reve.’ Cua co jae mboroyocui tenondegua vae —jei chupe—. ³¹ Jare jaicue rupigua co cua: ‘Eau nderapicha nde ndiyerau rami.’ Mbaeti ūru mboroyocui tenondegua cua reta güi vae —jei.

³² Jayave mboroyocui re oporomboe vae jei Jesús pe:

—Añete co, oporomboe vae. Icavi ndere Tumpa pentiño co jare mbaeti ye ūru. ³³ Jare yaau yave Tumpa opaete yandepia reve, opaete yanderecove reve, opaete yandepiayemingueta reve jare opaete ñanepirāta reve, jare yaau yave yanderapicha yande yayerau rami, jocua icavi opaete maemimba Tumpa peguarā ñamee vae reta güi —jei.

³⁴ Jare Jesús uyandu yave jae jei jupi cavi vae, jei chupe:

—Jeta'ā uata ndiyeyocui vaerā Tumpa pe iporoyocuia pe.

Jare mbaeti ma quía uipota upirandu chupe mbae re.

*¿Quía iñemoñaa reta pegua pa co Cristo?
(Mt 22.41-46; Lc 20.41-44)*

³⁵ Jare Jesús oporomboe oĩ Tumpa jo pe.

—¿Maera pa jei mboroyocui re oporomboe vae reta Cristo co jae David iñemoñaa reta pegua? —jei—. ³⁶ Echa'ã David etei jei Espíritu Santo rupi cuarãi:

‘YandeYa jei cheYa pe:

Eguapí cheyípi pe cheacata coti,
nderovaicho reta opa amiamiri regua.’

Jucuarãi jei David aracae —jei Jesús—. ³⁷ ¿Quirãi pa ipuere ico David iñemoñaa reta peguarã? Echa'ã David etei jei chupe: ‘CheYa’ —jei Jesús chupe reta.

Jare jeta vae uyapisaca ñugüinói Jesús re uyerovia reve.

Jesús umbijeco mboroyocui re oporomboe vae reta

(Mt 23.1-36; Lc 11.37-54; 20.45-47)

³⁸ Jare Jesús oporomboe yave, jei chupe reta:

—Piñemoa ngatu mboroyocui re oporomboe vae reta güi —jei—. Jae reta jecuaeño uipota uguata jemimonde pucu vae reve, jare jecuaeño uipota ñru vae reta pe uyembisaludaca vaerã calle reta rupi —jei—. ³⁹ Yugüiraa yave tupao pe jare parea pe, jecuaeño uipota uguapi tenda tenondegua vae reta pe —jei—. ⁴⁰ Jare upiro reta cuña ime umano vae reta güi opaete imbaembae, jare pucu uyerure Tumpa pe upurumbitavi vaerã —jei—. Jae reta uioporara eteta co —jei chupe reta.

*Cuña ime umano vae umee corepoti Tumpa pe
(Lc 21.1-4)*

⁴¹ Penti ara Jesús uguapi oĩ corepoti jíru jovai Tumpa jo pe, jare uecha quirãi jeta yugüeru vae reta oñono corepoti pípe. Ícocatu vae reta oñono jeta corepoti. ⁴² Jare ou vi penti cuña ime umano vae iparavete vae. Jae oñono mocui riare. Jocua jeta'ã co jepi. ⁴³ Jare Jesús ueni jemimboe reta jare jei chupe reta:

—Añete che jae peve, cua cuña ime umano vae iparavete vae uyapo jeta opaete ūru oñono vae reta güi —jei—. ⁴⁴ Echa'ã opaete ūru reta güeru oñono jeta güinoi vae güi. Êrei cua cuña, yepe tẽi iparavete, oñono opaete güinoi vae. Jocua co jembíu jepirã tẽi vae —jei chupe reta.

13

*Tumpa jo uyeitita
(Mt 24.1-2; Lc 21.5-6)*

¹ Jesús oẽ yave Tumpa jo güi, penti jemimboe jei chupe:

—Mase, oporomboe vae, icavi cua ita reta jare o reta.

² —¿Nemae pa neĩ cua o tuicha vae reta re? —jei Jesús chupe—. Ndaraupiita penti ave ita ūru ita iárambo. Opaete uyeitita co —jei.

*Mbaesusere reta uyeyapota vae
(Mt 24.3-28; Lc 21.7-24; 17.22-24)*

³ Jare Jesús uguapi oĩ rambueve ivitu guasu Olivos re Tumpa jo jovai, Pedro, Jacobo, Juan jare Andrés upirandu chupe, jae retaño jae ndive ñugüinoi yave:

4 —Emimbéu oreve, ¿quirāi yave pa cua uyeyapota? Jare opaete cua uyeyapota ma yave, ¿quirāita pa nduicuaa? —jei reta chupe.

5 Jayave Jesús jei chupe reta:

—Piñemoa ngatu agüiye vaerā petavi. **6** Echa'ã yugüeruta jeta cheree pe uyembijeeta vae reta. Jae reta jeita: ‘Che co jae Cristo.’ Jare umbitavita jeta vae reta —jei—. **7** Imeta co ñerāro reta coño pegüi. Imeta vi ñerāro reta mbirí pegüi. Piyandu yave cua reta regua, agüiye pequiyé. Cua susere reta uyeyapoñotai co. Êrei cua susere reta ndei ave co opa vaerā —jei Jesús—. **8** Penti ivi pegua reta uñerārota ambie ivi pegua reta ndive, jare mburuvicha reta uñerārota ūru mburuvichá reta ndive. Jare ivi tanta ucātata jeta que rupi. Jare imeta caruai reta jare tecorai reta. Êrei cua susere reta uyembipí ramo co oĩ —jei chupe reta—.

9 Piñemoa ngatu. Echa'ã ūru vae reta pereraata mburuvicha reta ñugüinói vae pe, uñeapo vaerā peré. Jare penupata judío reta itupao reta pe. Jare pereraata mburuvicha guasu reta jovai chereco pegua, chemimbéu vaerā chupe reta —jei—. **10** Jare Tumpa iñee icavi vae jerācuata co rani opaete ivi pegua reta pe —jei—. **11** Jare ūru vae reta pereraa yave pemee vaerā mburuvicha reta pe, agüiye piyemipia'ã mbae pereta vae re —jei—. Pemee yave, Tumpa uicuaacata peve mbae pere vaerā. Jocuaño pere. Echa'ã Espíritu Santo pemberita piyemingueta vaerā, pe retaiño'ã co piyeminguetata —jei—. **12** Tiuei umeeta tivi, uyucaca vaerā. Jare tu umeeta isambiai. Jare sambiai reta oyovaichota tu jare ichi ndive, jare

uyucacata reta. ¹³ Jare piñemitarẽicata opaete vae pe chereco pegua. Ërei jõsata oo uvãe iyapi pe vae uyembiasacata co —jei chupe reta—.

¹⁴ Jare peechata icavi mbae vae opaete urucumegua vae uyemboi oĩ oïta'ã tẽi vae pe. Tumpa iñee aracae umimbeu vae Daniel jei uyecuaata co. (Umingueta vae tuicuaa) —jei—. Jayave Judea pe ñugüinoi vae reta tosi ivitù guasu coti —jei—.

¹⁵ Jare o cupe re oĩ vae ugüeyi yave, agüiye tuique jo pe güiraa vaerã imbaembae. ¹⁶ Jare ico pe oĩ vae agüiye tou ye jenta pe güiraa vaerã iyasoya —jei—. ¹⁷ Jare ipurúa vae reta jare umicambu vae reta uiporarata jocua ara reta pe —jei Jesús chupe reta—.

¹⁸ Piyerure Tumpa pe cuarãi: ‘Agüiye emaeño tuyeyapo roí ma yave.’ ¹⁹ Echa'ã jocua ara reta pe ivi pegua reta uiporara eteta. Jucuarãi'ã uiporara reta Tumpa ivi uyapo güive, jare ndarau ye jucuarãi uiporara reta —jei—.

²⁰ Jare yandeYa uipota'ã yave opa vaerã jocua ara reta, mbaetita tẽi quía ipuere ico. Ërei Tumpa uiparavo vae reta jeco pegua opata jocua ara reta —jei chupe reta—.

²¹ Aramoi jocua ara reta pe quía jeita peve: ‘Mase, co oĩ Cristo’, ani jeita: ‘Mase, pee oĩ Cristo.’ Jucuarãi jei yave, agüiye perovia —jei—.

²² Amocue upurumbitaví vae reta jeita: ‘Che co jae Cristo’, jare ïru upurumbitaví vae reta jeita: ‘Che co jae penti Tumpa iñee umimbeu vae.’ Jare jae reta uyapota miacañi reta, umbitaví vaerã tẽi Tumpa uiparavo vae reta —jei—.

²³ Piñemoa ngatu.

Amimbeu ma peve opaete, ndei uyeyapo mbove —jei chupe reta—.

*Cuimbaerā uyeyapo vae ou yetā
(Mt 24.29-44; Lc 21.25-36)*

²⁴ Jayave opa uiporara reta jocua ara reta pe yave, guarasi uñemipítumimbita, jare yasi ndarau ma jembipe. ²⁵ Yositata reta oata ara güi, jare opaete ara re mbaepuere güinoi vae reta ucātata —jei—. ²⁶ Jayave ivi pegua reta cherechata ayu amapítu reve. Che cuimbaerā ayeyapo vae anoita mbaepuere tuicha vae, jare ayembiadoreacata opaete vae pe —jei—. ²⁷ Jayave amondota ángel reta güeru vaerā aiparavo vae reta opaete ivi rupi güi —jei—.

²⁸ Yandepuere yamijaanga iva. Piyemboe jese —jei—. Joqui yave, picuua uyaro ma co ama oqui vaerā —jei Jesús—. ²⁹ Jae ramíño vi pe reta pеechа yave cua mbaembae uyeyapo ñugüinoi vae, picuuaata che coiño ma co aí —jei—. ³⁰ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei chupe reta—. ³¹ Ara jare ivi opata, ērei chiñee ndarau opa —jei—.

³² Ērei mbaeti quía uicuua mbae ara pe ani mbae ora pe yepe cua uyeyapota, jaeño cheRu. Ángel ara pe ñugüinoi vae reta uicuua'ā. Che co jae Tumpa Tai. Ērei che ave aicuua'ā —jei—. ³³ Jecuaeño peáro, jare piyerure Tumpa pe. Echa'ā picuua'ā quirāi yave ra uyeyapota —jei—. ³⁴ Yamijaanga penti cuimbae oo ambie ivi pe vae. Oota ma jenta güi yave, umee mbaepuere jembiocui reta pe, jare oyocui penti penti uyapo vaerā iparavíqui, jare oyocui vi taraquēra jāroa uāro cavi vaerā —jei—. ³⁵ Picuua'ā quirāi yave ra tenta iya ou yetā uvāe.

Aramoi outa uvāe p̄itu ave ma yave, ani piare catu yave, ani uru cuimbae uñee yave, ani neimbove yave —jei—. Jáeramo peāro peī, ³⁶ agüiye vaerā, aramoiño ou uvāe yave, pepocou peque peī—jei—. ³⁷ Jare cua jae peve vae jae vi opaete vae pe: Peāro peī—jei chupe reta.

14

*Jovaicho reta uyemingueta uyucaca vaerā Jesús
(Mt 26.1-5; Lc 22.1-2; Jn 11.45-53)*

¹ Mocui araño ma uata pascua uyapo reta vaerā. Jocua ara pe judío reta jou mbiyape ovu mbae vae. Jare sacerdote reta itenondegua reta jare mboroyocui re oporomboe vae reta ueca ñugüinói quirāi ipuere uipisi taví rupi Jesús, uyucaca vaerā.

² Ërei jei reta:

—Agüiye yaipisi pascua ara rupi, agüiye vaerā tenta guasu pegua reta uyapo tecorai.

*Cuña upiyere mbae ipiche cavi vae Jesús re
(Mt 26.6-13; Jn 12.1-8)*

³ Jare Jesús ucaru oĩ rambueve Betania pe Simón ipire ocuisse vae jenta pe, uique penti cuña. Jae güeru iru-rai ita alabastro jee vae pegua. Cua iru-rai tñee mbae ipiche cavi vae nardo jee vae pe. Cua nardo jepi ete. Cuña oyoca iru-rai, jare upiyere nardo Jesús iñaca re. ⁴ Jayave amocue joco pe ñugüinói vae pochi jare jei uyupe:

—¿Maera pa umicañitei? ⁵ Umee yave corepoti re, güinoita tēi trescientos ara mbaravíqui jepi pegua umee vaerā iparavete vae reta pe —jei reta.

Jayave iñera reta jese.

⁶ Ërei Jesús jei chupe reta:

—Pemaeño jese. ¿Maera pa pemambeco? Icavi vae co uyapo cheve —jei—. ⁷ Echa'ã yugüirecoñotai co iparavete vae reta pe reta ndive, jare pipota yave, pepuereta pembori. Êrei che ndaraau aicoño pe reta ndive —jei—. ⁸ Cua cuña uyapo ipuere vae. Chembipiche cavi ma, ndei añañotica mbove —jei—. ⁹ Añete che jae peve, opaete ivi rupi Tumpa iñee icavi vae jerācua vae rupi, cua uyapo vae vi jerācuata, ūru vae reta imandúa vaerā jese —jei chupe reta.

Judas umeeta Jesús

(Mt 26.14-16; Lc 22.3-6)

¹⁰ Jayave jocua doce jemimboe reta güi penti Judas Iscariote jee vae oo sacerdote reta itenondigua reta ñugüinoi vae pe, umee vaerā Jesús chupe reta. ¹¹ Cua uicuña reta yave, uyerovia reta, jare jei Judas pe umeeta co chupe corepoti. Jayave Judas umbipi ueca quirāi ipuere umee vaerā Jesús chupe reta.

Jesús ucaru jemimboe reta ndive

(Mt 26.17-29; Lc 22.7-23; Jn 13.21-30; 1 Cor 11.23-26)

¹² Pascua ara pe judío reta uyuca ovecha. Jocua ara umbipi jou mbiyape ovu mbae vae. Jayave Jesús jemimboe reta jei chupe:

—¿Quiape pa ndipota nduyapicatu vaerā, tembíu pascua pegua ndeu vaerā?

¹³ Jayave Jesús oyocui mocui jemimboe reta:

—Pecua tenta guasu pe —jei chupe reta—. Peovāitita joco pe penti cuimbae i güiraa ūru pe vae. Pecua jaicue —jei—. ¹⁴ Jare uique yave tenta pe, pere tenta iya pe: ‘Oporomboe vae jei: ¿Quiape

pa ime oĩ o, joco pe jau vaerã tembiú pascua pegua cheremimboe reta ndive' —jei, pere chupe, jei Jesús—. ¹⁵ Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandeve —jei chupe reta.

¹⁶ Jare Jesús jemimboe reta yugüiraa uvãe yave tenta guasu pe, uvãe opaete Jesús jei chupe reta vae rami. Jare uyapo reta tembiú pascua pegua jou reta vaerã.

¹⁷ Jare pítu ma yave, Jesús oo jocua doce jemimboe reta ndive. ¹⁸ Jare mesa pe uguapi ucaru ñugüinói rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe. Jae co penti ucaru oĩ che ndive vae —jei.

¹⁹ Jayave jae reta ipiatiti, jare upírandu Jesús pe penti penti rupi:

—¿Che pa co jae?

²⁰ —Pe reta co jae doce cheremimboe reta —jei Jesús chupe reta—. Penti pepite pe oĩ vae co jae. Mbiyape umäqui oĩ che ndive plato pe vae co jae —jei—. ²¹ Che cuimbaerã ayeyapo vae aañotai amano vaerã, Tumpa iñee pe uyecuatía oĩ cheregua rami. Êrei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

²² Jare jae reta ucaru ñugüinói rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Peu —jei chupe reta—. Cua co jae cherete —jei.

23 Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe. Jare opareve jou copa güi. **24** Jesús jei chupe reta:

—Cua co jae cherugüi. Cherugüi uyepiyereta, Tumpa jei piau ye vae uyeyapo vaerä, jare jeta vae reta uyembiasaca vaerä —jei Jesús—. **25** Añete che jae peve, ndarau ma jau uva ticuecue, Tumpa iporoyocuia pe uva ticuecue ipiau vae jau regua —jei chupe reta.

Pedro uicuacuta Jesús

(Mt 26.30-35; Lc 22.31-34; Jn 13.36-38)

26 Jare opa yave ucanta reta Tumpa pe, oẽ reta yugüiraa ivitu guasu Olivos coti. **27** Jayave Jesús jei chupe reta:

—Opaete pe reta chereyata cua p̄itu. Echa'ã Tumpa iñee pe uyecuatía oĩ cuarãi: ‘Ayucata ovecha reta iyandarecoa, jare ovecha reta opata uñlemiai.’ Jucuarãi uyecuatía oĩ —jei chupe reta—. **28** Êrei aicove ye ayu yave umanocue vae reta ipite güi, aata perenonde Galilea pe —jei.

29 Jayave Pedro jei Jesús pe:

—Yepe t̄ei opaete ūru reta tandereya, êrei che ndarau ndueya.

30 —Añete che jae ndeve —jei Jesús chupe—, cua p̄itu etei, ndei mocui vese uru cuimbae uñee mbove, mbapí vese ma checuacuta —jei.

31 Êrei Pedro jeiете jei:

—Yepe t̄ei tamano nde ndive, êrei ndaraui nducuacu.

Jare jucuarãi vi jei opaete Jesús jemimboe reta.

*Jesús uyerure Getsemaní pe
(Mt 26.36-46; Lc 22.39-46)*

32 Jayave yugǖraa uvāe reta Getsemaní pe.

—Peguapi cua pe, che aa ayerure Tumpa pe rambueve —jei Jesús jemimboe reta pe.

33 Jayave gǖraa Pedro, Jacobo jare Juan, jare umbipi ipiatiti jare uiporara.

34 —Tuicha chepiatiti, jare amano pota echa. Pepita cua pe, jare agǖye peque —jei jocua mbapi jemimboe reta pe.

35 Jayave Jesús usiri catu chugǖi reta, jare uyeatica ivi re. Uyerure Tumpa pe, Tumpa uipota yave, umbiasa vaerā chugǖi jocua uyeyapota chupe vae.

36 —CheRu, cheRu, opaete mbae ndepuere ndiyapo. Embiasa chegǖi cua aiporarata vae. Ërei tuyeyapo cheve nde ndere vae. Agǖye tuyeyapo che jae vae —jei.

37 Jayave Jesús ou jemimboe reta ñugǖinoi vae pe, jare uecha oque ñugǖinoi. Jayave jei Simón Pedro pe:

—Simón, ¿ndeque pa? ¿Ndepure'ã pa ndeque mbae neñ penti ora yepe? —jei chupe.

38 Jei vi jemimboe reta pe:

—Agǖye peque. Piyerure Tumpa pe, agǖye vaerā peyoa. Pepia pe peratangātu co, ërei perete iyaqui co —jei.

39 Jayave Jesús usiri ye uyerure Tumpa pe tenonde uyerure vae rami. **40** Jayave ou ye jemimboe reta ñugǖinoi vae pe, jare uecha oque ye ñugǖinoi. Echa'ã jae reta jopei ete ma. Jare

uicuaa'ã mbae jei vaerã Jesús pe. ⁴¹ Jayave Jesús usiri ye mbapia re, jare ou ye yave, jei chupe reta:

—Peque jare peputuño ma. Jocuaño ma. Ora uvâe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—. ⁴² Pepúa. Yaaño ma. Mase, chemeeta vae coiño ma ou —jei chupe reta.

Uipisi reta Jesus

(Mt 26.47-56; Lc 22.47-53; Jn 18.2-11)

⁴³ Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquiserucu reve jare iivira reve reve. Sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta ombou Jesús pe cua reta. ⁴⁴ Jare umeeta vae umimbeu ma ūru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi, jare peraa. Agüiye tosi —jei.

⁴⁵ Judas ou uvâe yave, ou voi Jesús oĩ vae pe.

—Oporomboe vae, oporomboe vae —jei chupe.

Jayave uyurupite. ⁴⁶ Jayave uipisi reta Jesús.

⁴⁷ Jare penti cuimbae joco pe oĩ vae uequi iquiserucu jiru güi, sacerdote tenondegua jembiocui re uiporu, jare uyasia inambi chugüi.

⁴⁸ Jayave Jesús jei yugüeru vae reta pe:

—¿Maera pa Peru quisepucu reta jare iivira reta chepisi vaerã, imonda vae pipisi vae rami? ⁴⁹ Opa ara aico pe reta ndive Tumpa jo pe. Joco pe aporomboe, jare chepisi'ã. Èrei piyapo cua, Tumpa iñee uyecuatia oĩ vae uyeyapo vaerã —jei.

50 Jayave opaete jemimboe reta ueya Jesús, jare opa osi.

Cunumi osi vae

51 Jare penti cunumi uñepēgua penti asoya pe vae oo Jesús jaicue rupi. Jare amocue joco pe ñugüinoi vae reta uipisi tēi. **52** Ërei jae ueya iyasoya, jare nani etei oẽ osi.

Jesús uyemboi jovaicho reta jovai

(Mt 26.57-68; Lc 22.54-55, 63-71; Jn 18.12-14, 19-24)

53 Jayave güiraa reta Jesús sacerdote tenondegua jenta pe. Jare joco pe uyembati opaete sacerdote reta itenondegua reta, tenta guasu pegua reta itenondegua reta, jare mboroyocui re oporomboe vae reta. **54** Jare Pedro oo vi Jesús jaicue. Ërei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive uyepee ñugüinoi tataipi pe. **55** Jare sacerdote reta itenondegua reta jare opaete ūru mburuvicha reta ueca quía uñeapo vaerā Jesús re, uyucaca vaerā. Ërei uvāe'ā reta teco jese. **56** Yepe tēijeta vae iyapu reve uñeapo jese, ërei jei reta tēi vae oyovaque'ā. **57** Jare amocue upūa uñeapo iyapu reve jese vae jei:

58 —Ore nduyandu jei: ‘Ambusururuta Tumpa jo cuimbae reta uyapo vae, jare mbapi ara pe che ayapota ūru Tumpa jo cuimbae reta uyapota'ā vae’ —jei, jei reta.

59 Ërei yepe tēi jucuarāi jei reta, ërei jei reta tēi vae oyovaque'ā. **60** Jayave sacerdote tenondegua

upūa uyemboi yati vae reta ipite pe, jare upirandu Jesús pe:

—¿Maera pa niñee nemoë'ã? ¿Mbae re pa cua reta uñeapo nderé? —jei.

⁶¹ Êrei Jesús quïño. Jei'ã mbae ave. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Taí? —jei.

⁶² —Jae co che —jei Jesús chupe—. Jare che cuimbaerã ayeyapo vae cherechata co aguapi aí Tumpa mbaepuere güinoi vae iyipí pe iyacata cotí. Cherechata vi ayu amapítu reve —jei.

⁶³ Jayave sacerdote tenondegua cua uyandu yave, pochi ramo omondoro jemimondei, jare jei:

—¿Maera ma pa yaeca yeta ūru vae reta uñeapo vaerã jese? ⁶⁴ Piyandu ma icavi mbae vae jei Tumpa cotí —jei—. ¿Mbae pa pere añave? —jei.

Jayave opaete reve jei reta:

—Icavi'ã co. Icavi co yayucaca vaerã —jei reta.

⁶⁵ Jare amocue vae umbipí undiví jese, jare ue-sañoma, jare ocua jese. Jare jei Jesús pe:

—Emimbeu oreve quía ra ocua oí nderé.

Jare sacerdote tenondegua jembiocui reta ocua vi jese.

Pedro uicuacu Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Jare Pedro oca pe oí rambueve, ou penti cuñatai sacerdote tenondegua pe uyeyocui vae.

⁶⁷ Jare uecha yave Pedro uyepee oí, omondo umae jese.

—Nde vi co jae Jesús Nazaret pegua iiru —jei chupe.

68 Jayave Pedro uicuacu Jesús.

—Aicuaa'ã jocua cuimbae, jare aicuaa'ã mbae ndere vae —jei Pedro chupe.

Jayave Pedro oo onque tuicha vae coti. Jare uru cuimbae uñee. **69** Jayave cuñatai uecha ye, jare imiari jese joco pe ñugüinoi vae reta pe:

—Cua cuimbae co jae penti Jesús iíru —jei.

70 Ërei Pedro uicuacu ye. Jare ndei ima mbove joco pe ñugüinoi vae reta jei ye Pedro pe:

—Añete nde co jae penti Jesús iíru. Echa'ã nde vi co jae penti Galilea pegua. Nde ndiyemingueta jae reta uyemingueta vae rami —jei reta chupe.

71 Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae piyemingueta peñ jese vae.

72 Jayave uru cuimbae uñee ma mocui vese. Jare Pedro imandúa Jesús jei chupe vae re: “Ndei mocui vese uru cuimbae uñee mbove, mbapi vese ma checuacuta.” Jare cua re ipia pe uyemingueta yave, umbipi uyao.

15

Jesús uyemboi Pilato jovai

(Mt 27.1-2, 11-14; Lc 23.1-5; Jn 18.28-38)

1 Jayave cõe rupive sacerdote reta itenondegua reta, tenta guasu pegua reta itenondegua reta, mboroyocui re oporomboe vae reta, jare opaete iíru mburuvicha reta uyembati uyemingueta ñugüinoi reta uyupii. Jayave uipocua Jesús jare güiraa Pilato pe umee. **2** Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

³ Jayave sacerdote reta itenondegua reta uñeapo Jesús re jeta mbaembae re. ⁴ Jayave Pilato upírandu ye Jesús pe:

—¿Maera pa niñee nemoë'ã? Mase, jeta mbaembae re uñeapo reta nderé —jei.

⁵ Ërei Jesús jei'ã mbae ave chupe. Jáeramo Pilato ipiacañi jese.

Pilato jei Jesús umanota co

(Mt 27.15-31; Lc 23.13-25; Jn 18.38–19.16)

⁶ Jare pascua ara rupi Pilato oyoracañoi penti pereso tenta guasu pegua reta uipota vae. ⁷ Jare peresoriru pe ñugüinói amocue upuruyuca vae reta. Cua reta upuruyuca, mburuvicha reta ndive uñeráro yave. Penti jee co Barrabás. ⁸ Jare jeta vae yugüeru uyerure Pilato pe uyapo vaerã chupe reta opa año uyapo rami. ⁹ Jayave Pilato jei chupe reta:

—¿Pipota pa ayoraca vaerã peve judío reta juvicha guasu?

¹⁰ Echa'ã jae uicuaa sacerdote reta itenondegua reta umee Jesús chupe ñacatãa jese ramo. ¹¹ Ërei sacerdote reta itenondegua reta omboemboe yati vae reta:

—Piyerure Pilato pe oyoraca vaerã peve Barrabás. Agüiye toyoraca Jesús —jei reta.

Jayave jucuarãi uyerure reta Pilato pe. ¹² Jayave Pilato upírandu chupe reta:

—Barrabás ayoraca yave, ¿mbae pa pipota ayapo vaerã cua cuimbae judío reta juvicha guasu pere chupe vae pe?

¹³ Jayave jae reta iñeeäta reve jei:

—Icutuca curusu re.

¹⁴ Êrei Pilato upirandu chupe reta:

—¿Mbae icavi mbae vae pa uyapo?

Êrei jae reta jeiete iñeeäta reve jei:

—Icutuca curusu re.

¹⁵ Jayave Pilato oyoraca chupe reta Barrabás, uipota umbiyerovia reta ramo. Jare Pilato uinupaca yave Jesús chicote pe, umee sundaro reta pe, uicutu vaerã curusu re.

¹⁶ Jayave sundaro reta güïraa Jesús juvicha joca palacio pe, jare ueni opaete íru sundaro reta.

¹⁷ Jayave sundaro reta omondeca Jesús pe temimonde pïta vae, jare oñope yuräti catuui vae, jare umbapúa oñono Jesús iñäca re. ¹⁸ Jayave umbipi umbiadora-raanga reta.

—¡Viva, judío reta juvicha guasu! —jei reta.

¹⁹ Jare uiporu reta iñäca re ivira. Jare undivi reta jese, jare uyeatica reta jae jovai umbiadora-raanga vaerã. ²⁰ Jare opa oyoyai reta yave, sundaro reta omboi chugüi temimonde pïta vae, jare omondeca ye chupe jae jemimondei. Jayave güïraa reta mburuvicha guasu joca güi, uicutu vaerã curusu re.

Jesús uyecutuca curusu re

(Mt 27.32-44; Lc 23.26-43; Jn 19.17-27)

²¹ Penti cuimbae Simón jee vae tenta guasu Cirene pegua, Alejandro jare Rufo tu, ou uväe tenta guasu coti. Jocoropi uasa oo oï yave, sundaro reta güïraaca chupe Jesús icurusu. ²² Jare sundaro reta güïraa Jesús Gólgota jee vae pe. (Cua uipota jei: “Acacuerenda”.) ²³ Jayave umee reta Jesús pe vino uyea mirra ndive vae. Êrei Jesús

jou'ā. ²⁴ Jayave sundaro reta uicutu curusu re. Jayave uyuguari reta Jesús jemimonde re, uicuaa vaerā mbae nunga penti penti güíraa iyupe vaerā. ²⁵ Jare neimbove yave nueve pe, uicutu reta Jesús curusu re. ²⁶ Jare oñono reta curusu re Jesús iñāca iárambo uyecuatía mbae umbijeco jesegua vae: “Judío reta juvicha guasu.” ²⁷ Jare sundaro reta uicutu vi curusu re mocui imonda vae reta, jare oñono penti Jesús iyacata coti jare ūru iyaso coti. ²⁸ Jare uyeyapo ma Tumpa iñee uyecuatía oī vae: “Ūru vae reta jei tēi jae vi co penti icavi mbae vae.” ²⁹ Jare uasa vae reta uñeācambívava reve jei icavi mbae vae Jesús pe.

—Aa! —jei reta—. Nde ndere nembusururuta co Tumpa jo jare ndiyapo yeta mbapi ara pe. ³⁰ Iyerepi añave, jare egüeyi curusu güi —jei reta.

³¹ Jae ramiño vi sacerdote reta itenondegua reta jare mboroyocui re oporomboe vae reta imiari uyupe yave, oyoyai reta.

—Jae uepi ūru vae reta —jei reta—. Êrei ipuere'ā jae uyerepi. ³² Jae co Cristo, Tumpa ombou vae yave, jae co Israel pegua reta juvicha guasu yave, tugüeyi añave curusu güi, yaecha vaerā, jare yarovia vaerā —jei reta.

Jare Jesús ndive uyecutu ñugüinói vae reta vi jei icavi mbae vae chupe.

Jesús umano

(Mt 27.45-56; Lc 23.44-49; Jn 19.28-30)

³³ Jare guarasi ara mbite güive mbapi ora rupi uñemipítumimbi opaete ivi pe. ³⁴ Jayave mbapi ora ma caaru yave, Jesús iñeeäta reve jei:

—Eloi, Eloi, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

³⁵ Amocue joco pe ñugüïnoi vae uyandu jare jei tëi:

—Mase, Elías ueni.

³⁶ Jare penti vae osi oo umäqui esponja vinagre pe, jare oñono ivira re, jare omondo Jesús iyuru cotí.

—Peäro —jei—. Yaecha ou Elías umbigüeyi vaerä —jei.

³⁷ Jayave Jesús tanta usapicai, jare umano.

³⁸ Jayave Tumpa jo umbiyao vae osoro mbite rupi ivate güi ivi cotí. ³⁹ Jare sundaro reta juvicha Jesús jovai uyemboi oĩ vae uecha yave quiräi usapicai jare umano, jei:

—Añeteñoi yepe, cua cuimbae co jae Tumpa Tai.

⁴⁰ Jare amocue cuña reta umae ñugüïnoi mbiri güi. Cua reta ipite pe ñugüïnoi María Magdalena, Salomé jare María. Cua María imembí reta co jae Jacobo tairusu vae jare José. ⁴¹ Jesús Galilea pe icose yave, cua cuña reta yugüiraa jae ndive uyeyocui vaerä chupe. Jare jeta íru cuña yugüeru jae ndive Jerusalén pe vae reta joco pe ñugüïnoi vi.

*José oñono Jesús jetecue teõgüriru pe
(Mt 27.57-61; Lc 23.50-56; Jn 19.38-42)*

⁴² Jocua ara opaete judío reta uyeyapicatu ñugüïnoi piareve peguarã. Echa'ã piareve pe co mbutuu ara. Jáeramo guarasi uique ma yave, ⁴³ penti cuimbae tenta guasu Arimatea pegua José jee vae uñemiatangätu oo Pilato pe, jare uyerure chupe Jesús jetecue re. José co jae penti mburuvicha. Opaete tenta guasu pegua reta uipiú cua José. Jae uäro ico Tumpa iporoyocuia. ⁴⁴ Jare

Pilato ipiacañi Jesús umano ma vae re. Jayave ueni sundaro reta juvicha, jare upirandu chupe quirāi yave ra umano Jesús. ⁴⁵ Jare sundaro reta juvicha umimbeu chupe. Jayave Pilato jei José pe:

—Ndepuere nderaa Jesús jetecue.

⁴⁶ Jayave José ogua nieso. Jare umbigüeyi ma yave Jesús jetecue, oñoma nieso pe. Jayave oñono penti teögüriru itape uyeyoo vae pe, jare umbiyapayere ita tuicha vae teögüriru jonque re. ⁴⁷ Jare María Magdalena jare José ichi María jee vae uecha quiape oñono Jesús jetecue.

16

Jesús icove ye

(Mt 28.1-10; Lc 24.1-12; Jn 20.1-10)

¹ Mbutuu ara uasa ma yave, María Magdalena, Jacobo ichi María jee vae jare Salomé ogua mbae ipiche cavi vae, jare yugüiraa uipichi vaerā Jesús jetecue re. ² Jare neimbove asi domingo ara pe cua cuña reta yugüiraa teögüriru coti. ³ Jare jei reta uyupe:

—¿Quía ra umbisirita yandeve ita tuicha vae teögüriru jonque güi?

⁴ Ërei umae reta yave, uecha ita uyembisiri ma teögüriru jonque güi. Jocua ita tuicha co. ⁵ Jare uique reta yave teögüriru pe, uecha penti cunumi uguapi oĩ iyacata coti. Jemimonde pucu jare tĩ. Jare ipiacañi reta jese. ⁶ Ërei cunumi jei chupe reta:

—Agüiye pepiacañi. Peeca co peñ Jesús Nazaret pegua uyecutuca curusu re vae. Jae icove ye ma ou umanocue vae reta ipite güi. Mbaeti ma cua pe oĩ. Mase, pemae jendacue re —jei—. ⁷ Pecua

pere jemimboe reta pe jare Pedro pe: ‘Jae oota perenonde Galilea pe. Joco pe peechata, jae jei peve vae rami’ —pere chupe reta, jei.

⁸ Jayave cuña reta oẽ teōgüriru güi, jare tanta osi Yugüiraa. Uquiye ramo umbipi uriri. Jare jei'ã mbae ave quía pe.

*María Magdalena uecha Jesús
(Jn 20.11-18)*

⁹ Jesús icove ye ou umanocue vae reta ipite güi neimbove asi domingo ara pe. Jayave uyeechaca tenonde ete María Magdalena pe. Tenonde yave Jesús umbisiri siete aña reta cua cuña güi. ¹⁰ María oo umimbeu Jesús ndive yugüirecose vae reta pe. Jae reta ipiatiti ramo uyao ñugüinói. ¹¹ María jei chupe reta:

—Jesús icove ye ma oĩ. Aecha ma —jei chupe reta.

Êrei uyandu yave, güirovia'ã reta.

*Mocui jemimboe reta uecha Jesús
(Lc 24.13-35)*

¹² Cua jaicue rupi Jesús uyeechaca mocui jemimboe reta pe, jae reta Yugüiraa rambueve tape rupi tenta mbae vae coti. Ambie vae echa Jesús chupe reta. ¹³ Jae reta Yugüeru ye tenta guasu pe umimbeu ñru reta pe. Êrei jeseve güirovia'ã reta.

*Jesús oyocui jocua once jemimboe reta
(Mt 28.16-20; Lc 24.36-49; Jn 20.19-23)*

¹⁴ Cua jaicue rupi Jesús uyeechaca jocua once jemimboe reta pe etei, jae reta ucaru ñugüinói rambueve, jare uñengata chupe reta, upurugüirovia'ã jare ipiatanta ramo. Echa'ã ñru

vae reta uecha Jesús, icove ye yave ou umanocue
 vae reta ipite güi, jare umimbeu tēi jemimboe
 reta pe. Ërei jae reta güirovia'ã. ¹⁵ Jayave Jesús jei
 chupe reta:

—Pecua opaete ivi rupi. Pemimbeu Tumpa
 iñee icavi vae opaete ivi pegua reta pe —jei—
 . ¹⁶ Jocua güiroviata jare uyembibautizacata
 vae uyembiasacata. Ërei jocua güirovia'ã vae
 ucañiteita co —jei—. ¹⁷ Jare ūru vae reta uechata
 güirovia vae reta uyapo ñugüinoi cua nunga
 miacañi reta. Cheree re jae reta umbisirita aña
 reta oya jese vae reta güi. Uyeminguetata ambie
 ñee pe. ¹⁸ Uipisita mboi reta. Jou yave imbayachi
 vae, ndarau mbae uyeyapo chupe reta. Oñonota
 ipo imbaerasi vae reta re umbigüera vaerä —jei
 chupe reta.

*Jesús oo ara pe
 (Lc 24.50-53)*

¹⁹ Jayave yandeYa opa uyemingueta yave jae
 reta ndive, oo ara pe, jare uguapi Tumpa iyipi
 pe iyacata coti. ²⁰ Jare jemimboe reta yugüira
 umimbeu Tumpa iñee opaete que rupi. Jare
 yandeYa ombori, jare uicuaaca ūru vae reta pe
 jemimboe reta jei vae añete vae miacañi reta
 uyapo vae rupi. Jaeño ma.

**Nuevo Testamento Guaraní Pe
New Testament in Guaraní, Western Bolivian
(BL:gnw:Guaraní, Western Bolivian)**

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

**PDF generated using Haiola and XeLaTeX on 11 Nov 2022 from source files
dated 29 Jan 2022**

09a8356f-416c-5877-91cf-40f681db481e